

東省駐節錄

洪敬謨

著

戊子二月十八日

小人鄭宅鎬上書

近阻伏悵卽禱伏承

下書伏審春候乖宜

氣體候一向萬安伏慰且幸小人

東省駐節錄

文

五仙巖題名帖序

古所稱神仙云者聞其名而不見迹雖以秦皇漢武之勤於求仙者並不待尋其迹而徒勞而已至於王子之輕舉緱山史乃云然而只稱其事回老之飛過洞庭詩以傳之而未聞留迹噫其迹之難尋蓋如是夫按齊諧志云蓬萊之左腳千里遙遙東走海為金剛金剛在我東海頭之間而素稱仙聖之窟宅靈異之稠載者也既

夫一洞一壑一水一石遇之窈窕清奇無非人世仙境

天下無神仙則已有之則必在此間人之慕其名而尋其迹者踵相接也亦未見為宣海外仙聖之種日夕來往于萬二千峰之間而不使留其名也歟余於丙戌秋以**閩東**節行屬部歷選金剛諸勝于時也四太守一督郵從焉窺九龍之淵出玉流之洞觴于谷口之岩諸仙尉顧而樂之序其齒標厥邑皆噉仙字大書巖面高城柳侯詰祚曰蓬萊仙歛谷李侯義聲曰鶴林仙通川曹侯錫龜曰金蘭仙洪川韓侯璵曰洪厓仙海雲仙者祥雲丞任君泰濬也合而名之曰五仙巖品以題之詩以和之撮而成帖求余弁文余閱未半仙僊然神馳如復

在於玉流洞天夫九龍之遊俱以鞵藜披蒙茸履嶮巖
窮其勝賞而或跂石弄流或攬雲吸霞若可以超淑郵
稊窈冥不知我之為仙僊之為我而飄飄乎浩浩乎如
揖浮邱而拍洪崖則豈可使五仙遊迹湮沒無稱而亦
不欲誇示於後也乎豐岩有丹書之石臨溟有鍊丹之
臼丹書者四仙題名之迹也鍊丹者仙人修道之迹也
以是而尋其迹則丹書之仙鍊丹於斯而題名于彼者
也五仙之題名于岩者倘有慕於四仙之丹書其名而
之名也之迹也其將與四仙匹義於世寧不奇且幸哉
雖然是日也遊與之同是岩也賞與之同而不使余廁

名於巖上獨留五仙尉遊迹豈以余喻之以非仙乎抑
以余喻之以真仙乎真仙然後乃可以逃其名而晦其
迹如王子回老之流也

仍羽人閣記

營而鎮

營

鶴城仙真之宅也觀察使開閣於中以治之營之後有

門曰訪仙門之內有池曰太乙池之長數百畝廣眡長

三之一等地而成島者三水之積眡堤島之高出水島

各有亭曰蓬萊閣占池之南曰採藥塢宛在中央曰觀

風閣在塢之北駕虹橋於三以通于蓬萊觀風而藥塢

則西舫以達之三閣參差各盡其美蓬閣華而綉藥塢

奇而妙風開顯而敞朱簷西桶浮在水面而中設坐堂
可容一琴一几樓以翼之亘於眺遠脩軒可以張樂曲
房可以藏花仍以層櫺伏檻聯而環之是閣也居美而
觀盛攬諸勝而有之庭植牡丹海棠之屬與堤之百種
花卉幾株槐柳相蔭映錦波灩澦圓平如鏡風過之穀
紋生雨洒而龍鱗漾朝旭升夕照明堤邊林木與彩閣
倒垂作奇觀登樓則爽曠通眺四山嵐翠合抱如屏百
家籬落千畦禾黍歷歷如几案物晴雨花月
氣象萬千而四時之景不同八詠之美咸具觀察使每
於公餘使童子奉印小妓携琴飄然而至于閣則逍遙

乎堂中翩躚乎樓上投壺於斯觀射於斯不知日之將
夕俄而薄雲收翳皓月涵波清輝散射於窓檻枕席之
間人之在閣中者依然如猗水晶宮於是乎駕一葉沿
洄於三島之間眾籟俱消靈風蕭然而至命佳妓緩轂
奏羽衣之曲歌水仙之操恍若太乙之泛蓮而浮槎之
犯斗牛也旋又登樓弄玉笛數三闋池魚出聽庭鶴獻
舞令人仙々乎有憑虛凌霄之想而不知我之為仙々
之為我也噫有池窪然象十洲也有邱隆然象三山也
十洲三山之閒不可無綺樓彩閣而東方朔常言仙人
好樓居是閣也人世仙境而足以致寶駭羽蓋則宜名

之曰仍羽人閣遂大書麗眉以俟仙人云

七仙樓記

樓名凌波而曷之謂七仙七仙來游於樓也仙是山人
而曷之謂仙以登瀛之仙侶入蓬萊之仙山則
真仙也而亦非山人也七仙誰也尹侍郎舜和尚圭趙
學士仲必民和洪學士敬修敬謨朴仙尉希安宗復鄭
上舍一元東萬林雅士季鷹翰鎮李秀士聖陞周翼也
七仙之游何時也丙子初夏也七仙之扁誰書也洪學
士筆也洪學士以天官右侍郎出為金剛萬二千峰主
人仗玉節復游於樓即丙子後十年乙酉重陽日也時

尹侍郎職如舊而就養于湖南之茂長縣朴仙尉解金
壤之紱而閒居於駱山之陽林大雅登龍門上玉堂鄭
上舍承先蔭始筮仕李秀士依舊是城東布衣而馬首
俱不得以復東趙學士由右代言知陝西之慈城府旋
入白雲鄉十年之間獨我復來徘徊樓上顧想咨嗟前
遊殆若一夢色相俱空扁亦剗缺遂改書而揭之願語
山人如訓曰昔四仙遊三日於湖壁書留丹使四仙而
不有丹書今日何以知四仙之游曩我七仙之遊雖不
及於四仙之羽蓋飈輪而亦足以超淑郵軼埃壚則不
可無傳且余以七仙中一人管領仙山重登斯樓倚畫

戟於岩間斟菊醪於溪上與上人輩談空話禪其視前
日之游何如而鞵藜又將復到矣於以見洪崖仙緣最
多於七仙中此尤不可無傳並記七仙之來游日月誇
示後人乙酉重陽日洪崖老仙書于七仙樓中

珊瑚碧樹軒記

東海之上有郡曰真珠悉直氏之舊都也自新羅郡縣之
至我朝陞為府置郵於府之北以丞主之曰平陵督郵
成化乙未移建郵館於平陵之南交柯椅其衙曰珊瑚
館至乙酉秋不戒于火百年輪奐俄然為墟而丞亦小
歸未遑於新之丁君志鶴代之既至諗于众曰館所以

處官長而待賓旅也其將開於灰礫之場乎其將寄身
於茅茨之間乎咸曰官之來未之久也且俸薄而舉羸
奈何笑曰吾嘗籌之也節用而操其羨愛民而重其使
不亦可乎於是召工徒授以規矩且誡之曰無尚雕木
之異無榮飾土之奇因其舊址稍加新制蓋興功於重
陽之月而斷手於翌年之春衙之在焦土燹壁之間不
過旬朔之延而東西過客有數月之行者其還也徒見
其眼前之突兀如舊而所異者屋有新蓋砌無苔縫增
阿重雷爽朗宏敞虹梁霧樞飛舞海山工訖而馳書告
成且徵記於余使再三至則余聞而喜曰置郵傳命寄

寓旅舍皆三代為政之所謹故左氏傳曰高其閭闔厚其墻垣以無憂客使又曰周之簞子聘楚過陳見其客至不授館羈旅無所寓遂知陳之必亡我國郵傳之所以待使命館宇之所以待行旅亦是三代遺意而况是館也為政之所而統南北十六郵則視傳遽之館有異而尤不可一日無此居也君於新蒞之初捐俸縮廩以謀理新公隸趨役屬驛無怨不逾時而事集於是乎官有聽政之所歸傳稱客之譽不負三代之遺意豈不幸歟遂仍其舊號而改書曰珊瑚碧樹軒且記其事以歸之蓋因交柯之名而取韓文公珊瑚碧樹交枝柯之詩

名于軒而丞亦冒其名稱之以珊瑚丞云

御史趙公通川遺惠碑陰記

正廟癸卯大司寇趙公以弘文館校理膺閑東持斧之命咨諏山海之間爬櫛民邑之弊啟達天陛多所釐革而於嶺東之通川垂惠也最多海夫津尺罔不胥欣伐石而頌之暨我 當子癸酉公又按本道節多施蠲省之政通人詩以鐫其碑圭首龜趺屹然為九郡之望小子之叨守是邦在公後十有二年崇陰無改浦思不衰及夫巡過是郡有大石立於荒草斷甃之上視其面刻曰御史趙公某萬歲不忘之碑即下車摩挲徘徊而不

能去乃屬曹侯錫龜曰公之惠在民之慕在碑焉可使是碑不庇風雨剝泐而字難亡耶遂手書其文磨頽而改刻移豎於津村建閣而安之題其眉曰御史趙公碑閣噫公之澤于東民者前後無替則民之頌公亦當沒世而不謾其敢不嚴敬而愛護之如峴山之石襄陽之碑乎然則是碑也雖與是邑相終始可也願余小子無能為前人役每見公德政之布在一方者罔非可師可範而為政周歲尚無蠲一事革一弊以遺惠於東海之民尤不能無愧於是碑遂記顛末於碑陰

禁夢菴重修記

記昔乙卯冬上人知添重修禁夢菴乞文於我王考文獻公時余弱冠承公命繕寫記文而付添上人禁夢之旨蓋因添上人而聞之始未嘗不咨嗟感慨于中居然三十餘年之間小子髮已種而忝按洙東節每歲春秋祇謁莊陵菴卽陵之造汜寺菴之僧性輝時憲導余至菴之境窈而深菴之宇廢而頽先大夫記板隨而塵黷余之所以咨嗟感慨者誠不自知其何所由而彷徨不忍去也募緣鳩材經年工訖僧又請記其事余噫而復曰先大夫之記既重寫而紗籠之小子何贅焉然昔之所以聞言而咨嗟感慨者曩余登是菴而輒

又不禁其咨嗟感慨者噫 端廟禁中之夢乃在於百
粵萬山之中 端廟之珠邱象設儼然於百粵萬山之
中是豈禁中之所發而然哉菴之名祇令人滋疑于冥
漠難知之理於千百載之下也僧之慧其或異於吾儒
者之見歟嗚呼是為記

千佛洞記

高城通川之間蓋有千佛洞云楊蓬萊士彥記之而誇
張之游乎海山者按此而尋輒迷路而返余於丙子夏
入山而探竒導海而搜勝亦未之尋今春作金剛萬二
千峰主人省秋于屬部自山而海士人指點於長箭之

北曰千佛洞在是余聞而喜以輿溯北而行過鯨岩至
甌餅岩又折而西轉入山谷鳥道線盤於石磴最薄之
間而無處非磴峻險踰大嶺者三過深壑者二度危
棧下長麓者各一有石盤陀可坐石之西有壁而小瀑
懸焉又踰高岡危壑緣溪溯流而上則兩峯高聳相對
如門之內始開小洞天奇峯巒環圍如城止似登壇
開墨劍戟爭光湏渤一曲平作几案左右有長谷裏
又如此雖不能窮源亦足一觀而蓬萊所謂千佛洞則
非也記云豐岩西三十里有溫井西六七里有鉢峯
峯西二十里有潭透一石門而出尋蹊入門行可五六

里其中空洞寬敞玉峯周遭瓊崖四圍作一大洞天或
言千佛洞在臨道而踰甕遷渡且險川由一線草路而
入過卧龍潭行四五十里始抵洞夫豐岩高城也臨道
通川也一洞也而蓬萊之記則云在高城或者之言則
云在通川兩記未知孰是而蓬萊之記盛言峯巒之詭
竒岩石之雕鏤皆有人物之狀末云意者造化翁陶甄
人物之時起草於此洞而然歟然則記雖名之以千佛
洞而今所謂萬物草者意或其地也耶記又云古人游
楓嶽者何限而曾未有語及此者知其跡之不曾到也
是洞也既云在於通川高城之間則前乎蓬萊而無見

之者後乎蓬萊而亦無繼至者何歟苟使天地之慳秘
 者蓬萊能發之則既發之後何不明言其處使後人易
 知易尋而其云豐宕溫井鉢峯者皆阻路不相符其形
 容萬物之象者又太巧窳係常理之外自非桃源之幻
 界則徃古來今豈無一人到得而只許蓬萊獨見乎記
 又云若有繼余而至者則知吾說之不浪既有真境則
 何慮乎無人之繼至何疑乎其說之歸浪也此蓋高士
 神其說而自誇文人因其假而成真而自有蓬萊之說
 杜筇謝屐日夕來徃於高城通川之間新得一邱一壑
 之奇形恠狀者輒曰此千佛洞也皆非也而竟無尋其

真者豈慕虛名而枉勞其心神耶抑有之而不辨仙源
何處尋耶蓬萊之記或者之言可知其都歸烏有而千
佛一洞置之於有無之間可也

萬物草記

楊蓬萊士彥千佛洞記曰豐岩西三十里有溫井、西
六七里有鉢峯、之西二十里有溪透出一石門而出
尋蹊入門行可五六里其中寬敞作一大洞天洞中盤
陀雪布林立皆有人物之狀末云意者造化翁陶甄人
物之時起草於此洞而然歟後人因是而初出萬物草
之名窮搜於神溪之北溫井之西得一洞天曰此萬物

草也。藁藜之湊踵相接也。而萬物草之名遂顯于世。余自神溪追溫井。行隨寺僧所指而尋其處。則峯巒岩石大都精細瑰奇絕類。众香城然。以此謂蓬萊記云云之處。則殊未必然。意別有其地。而山中人秘之也。近世有新萬物草山居。蓋自今所謂萬物草。又行二十里。脩蹊危險。始到其所。則峰益精細。石益瑰奇。果不翅前者所見。且其程里地名與蓬萊記大略相符。然前之所見其背也。此特見其高而已。非是外復有異觀也。以故談者疑之。或曰皆非也。通川高城之間。別有千佛洞者。蓬萊所記蓋此地也。而居人諱而不言。七松亭有權氏子好

為方外遊嘗自謂見其地其言曰入此洞者古或由

溫井今則無徑可尋當自海谷村西徑北入崖谷間二十里有石對峙其色白而圓形如虹蜺成門者曰門岩過此幾十里有巨瀑偃流如鑊瓢之有柄者曰九歧淵又行十餘里洞始寬平中有小峰若覆孟峰之左右大小怪石行々立々千竒為群者爭為奇形皆有入物之狀石皆皎潔光潤如削玉此所謂萬物也泉瀑之雷鼓洪鍾者山谷皆應而不知在何方但聞其響每一移步如在脚下洞府窈曠無虎豹虫蛇而但以往路峭絕雖工於涉險者往々中道而廢必齎糧露宿而後可往

遷云權既親見而言之言固有徵然其所云門岩九歧
亦非記中所言也世之言萬物草者其說有三今之所
見者謂之舊也溫井之東長箭之西又有新者云而皆
謂之假蓬萊記所云處廼謂之真也至有新舊真假之
說或以指此為舊指彼為新以舊為假以新為真遠近
而有新舊之別新舊而有真假之疑要皆荒唐無徵不
可強名為能於斯三者推理善觀而默契焉則真假之
說必有能辨之者也

聖留窟記

聖留窟在蔚珍縣南十里許余自陞洋亭行到窟理時

西折而行田間又向南而遵川邊上一崖，腰石逕轉
回數弓迳盡而地復平大川自西逶迤而來如竹西樓
之五十川匯流崖下深處成潭，之下又作廣灘平沙
皓潔田疇錯落往々村落群聚於山底水邊後有石峯
壁立斗絕長可五六十丈廣為數十間而壁勢轉曲如
磬折焉是窟理時一隅也石色青黃相雜石性細而且
剛石面乍凹乍凸石樣多成竇穴大如釜鬲小如臼碓
淺深斜圓不一其形而或可容一人或可容二三人窟
傍一處廣可容數十人縣人設幕於此少坐吸茶將向
窟門都去一身上衣只着襦袴而束腰束胫俾不得牽

碍而極便利。駿帽則以纓緊繫於頤，納麻鞋着綦以出。窟裏危險且黑，故如是後始可行也。使縣人之慣出入者，執嚮導之人各持一燭入其實。門狹而低，折腰而入，纔進四五步，稍濶，起行又數步，崖落無途，梯以行。五六間復折而南，攀下數十梯，則地始平而廣，可數畝，穹然高濶而通。以火燭之，如怖石假山之懸峙於左右者。面之是奇形，怖像而微黃，微青且潤，且滑，或如銅錫之鑄成，或如金碧之設彩，又如冰溜之凝結者。釵股之橫，垂者地是細沙而水自壁上而點滴，仍成泥濕席而後可行。又進十許步，壁又遮前竇口，蓋隘蒲伏而入，又復

開洞左右諦視益覺殊異石紋之雕篆物狀者尤勝於
外幢幡之奇浮圖之狀應接不暇中有一柱屹然卓立
長為十餘丈周亦可數十圍如珠旒之作節如杖鼓之
連峙又似數十層石塔端刻蓮花牡丹儘是詭觀又行
十數步其石益奇怪其狀益多不可識而其若幢幡浮
圖者蓋高大五色眩亂如跌佛躡僧之狀不可勝數自
此地勢復高仰行八九步盡石迤甚傾仄依左壁魚
貫而進又入一門則有水成湫澗可衆畝而黝黑不知
其淺深中有二石一似車轂一似淨餅其上及僊所垂
幡蓋玲瓏燦爛湫之左右既狹且仄無可坐之地有石

垂下於右長可三四丈而左貼右摺貼摺之間自有罅
空以杖叩之應之如鼓大則雄而壯小則細而清有若
編磬之聲者縣人言沿池而入尤有奇觀其兩傍多穴
人有謬入則不可出或云窮其源可達平海之海濱蓋
去此二十餘里也羅僧聖留居於此修道故名一名撐
天窟古有伽藍於厓下川上而亦名以聖留云

海嶽傳神帖小記

仍羽人閣

仍羽人閣在原州營衛之後池中自宣化堂折而北迤
小角門而入曰訪仙門也不跬步而有池廣可數十畝

長倍之曰太乙池築土於池列以三島三島之間可以
容刀曰方丈島也島上各有彩閣南曰蓬萊閣曲房雕
棟竒而麗中曰採藥塢翼然小亭如在水之舫北曰仍
羽人閣曠如而蕭灑粵如而都雅閣之東西起雲橋通
于崖又駕於蓬閣之前達于訪仙之門曰垂虹橋也閣
之右茅亭臨池曰釣鰲亭也亭之南西閣跨崖曰瀛洲
榭也池之三閣參差齋屹各專其美而仍羽之閣占池
之宜集池之勝統于二而甲之真鳳麟之洲而仙聖之
宅也閣以池勝池以閣顯登覽之樂無適不宜池之魚
鳥堤之花竹如鏡中象山之嵐雲邑之烟火如簾外畫

與夫朝晝之異態晦明之換形皆為助閣之勝而至若
皓月冉冉自東而升水光如湧金銀上樓閣危際槐柳
倒影於水中長短疎密各隨其狀縱橫活動於几案之
下此閣之最奇勝而於閣而不予夜者不能識也閣舊
名觀風可以開衙於斯聽訟於斯而神仙無則已有則
必在於此故余改之曰仍羽人閣大書于楣又書玉爐
燒香疑是雲中之降朱欄弄笛依然月下之逢一長聯
造物無盡藏也神仙庶幾遇之橋頭明月一船樓下活
水半畝二短聯揭于柱閣之一名來仙觀余以洪厓老
仙東來駐節於閣中今為歲餘云

清虛樓

清虛樓在原州之酒泉酒泉勾麗之縣名也今廢而合
于原縣之西有石狀如槽水出石間就而飲者無不醉
焉故名云樓臨岸上孤騫明麗澄江繞欄娟岑壓檐大
有溪山之勝官廨村舍環布如護長橋垂柳迷離於雲
烟作畫圖障而皆吾几案物矣 肅廟庚子沈廷輔牧
是州 上聞清虛樓詩以寵之廷輔奉恩命紗籠于樓
間往鬱攸 英廟戊寅守臣重建 上手書原篇繼以
小識 命近臣往揭之 正宗戊申又火丁未改構
上次原韵略叙其槩揭于下 三朝宸章室墨前後焜

輝樓之名亦由是而益顯

錦江亭

錦江亭在寧越府衙之東錦障江上越有蓬萊太華會稽錦江之勝而江水紆折抱亭而流故亭以名焉亭窪然占地高宜眺目望蓬萊諸山庵從拱扶入於柱笏之中叢嵐濃翠變態無窮澄江一帶繞檻而走細浪緩波可沂可沿每值夕陽暎澈沙邊鷗鷺岸上槐柳相蔭暎作奇觀亭下官廨江外民居或近或遠籬落田疇隱見林木河村烟水氣掩靄霏微另開一幅畫幅松声雲影迷籬於耳目衣被之同亭之勝亦足謂天設靈區而錦

江是蜀中之水屢形於草堂之詩無亦有冤禽之啼血
乎愍忠祠落花岩俱在其傍

北寬亭

北寬亭在鐵原府衙之北岸頂西限大山南俯邑閭東
亦不甚闊豁惟直北一路陞之無涯際淡靄浮埃窅然
無盡若將窮青海而潁白山此亭之所以名也西之寬
然者琴鶴山去而為寶蓋山、之末縱三四阜攢髻擁
黛於遊塵之中簇、若管城子之蛻甲而逆其尖東瞻
弓裔故都即野中一奉壠坂絕無險阻拱挹之勢雖一
時僭竊何以坐領漢水以北乎

亭淵

亭淵在平康縣距北寬亭三十里黃侍中謹中按閑東
節築亭于茲子孫因居焉亭臨大川卽洞陰蒼玉屏之
上流演迤泓渟成一巨湖岩壁周遭數里如彎弓形古
松幾百株簇立其上偃蹇樛互每風至有綠竹聲尤與
現月為宜水窮而亭始翼然扁曰滄浪蕭灑幽夏隱者可以
棲遲也又轉而東駕武陵橋之下有宮女灘弓王出
走時宮女投死於此故名過橋而北亦有層壁澄潭仙
遊亭在其上今墟云

昭陽亭

昭陽亭在春川府北八里昭陽江南岸 正宗丁酉東

萊大水亭尔漂去李侯東馨移建於舊址西百餘武清

陰金公記曰俯臨長江前眺平野近依岩洞遠挹群山

清晏幽迥不可備述常論江湖樓觀之擅名一方余所

歷覽者陳光亭愜眼稱情令人樂而忘疲而逼近閭閻

欠超然出塵之想百祥樓宏濶壯麗浩々乎如坐空虛

之上而有閑塞慷慨之思降仙樓清流絕壁暎帶欄檻

幽圓遠廈四時俱宜而無敵洞夷曠之樂々民樓宏濶侔

百祥穩愜遜陳光而兼有閭閻閑塞之庇清心樓帶官

村而不厭其近環衆山而不厭其礙瞻然以暢俯然以

靜所可議者天造地設自然不及於以上諸名區畢竟
甲乙之第誰最居前而神遊夢想其在茲亭乎三淵詩
曰襟帶將無漢南地風流欲倒洩西州斯可見茲亭之
勝足與諸名樓相上下而為閩東之勝區矣

傍花溪

傍花溪谷雲九曲之第一曲也谷雲即古之史吞縣今
隸春川府自府北行八十里而外史倉又三十里而為
內倉是谷雲也金公壽增愛其泉石之勝卜居于此因
以為号隨其勝處分名九曲一曰傍花溪二曰青玉炭
三曰神女炭四曰白雲潭五曰鳴玉瀨六曰臥龍潭七

曰明月溪八曰隆義淵九曰疊石埕自外倉前進十五里洞天軒張碧嶽四圍兩崖分峙而左則壁立層疊石作盤陀之勢仍成三層之埕可容人千百水從兩崖之間又分三層而瀉下上則渟滃如潭中則縈迴偃流下則始噴薄直墜於數丈之下鳴雷噴雪砰礮喧祿復滾滾之東布散于洞外花木葱蒨雲物鮮華幽深澗寂隱然若武陵仙界可為九曲中第一勝處非徒為次序之第一也金公模畫九曲隨曲款識又與子侄次武夷櫂歌韻各自手書聯成一帖藏于書院

圖識曰自春川府北行渡毛津踰馬峴過鋤五芝村

西轉而過格里谷渡一溪此是谷雲下流而為洞口
也踰繇峴至此山回谷轉水石清壯余初名爲傍花
溪去吾家十里云

青玉炭

青玉炭茅二曲也自傍花溪從聲確行五里山回路轉
度石橋前進危湍左繞圓巖右聳石白而洞水碧而
清相與之色澄徹皎潔却似玉瓚中黃流

圖識曰自傍花溪過五里許轉一山石棧斜仄左臨
危灣右擁層峯此爲青玉炭云

神女炭

神女炭茅三曲也山勢排張盤陀平廣水之瀉下者居
三之一泠々作金石之聲與山光空濛如畫家妙境
圖識曰過青玉炭稍似閒張緣溪至此舊名妓亭余
改為神女炭又名貞女炭水上有梅月堂舊跡亦名
之曰清隱台云

白雲潭

白雲潭茅四曲也松磴迷密雲竇縱橫白石廣鋪上
下稍長水始滾流到嵌空合作一端渟為深潭盈科而
後溢奔墜於雲壁之下撞觸沸翻雲雪四集石面刻白
雲潭華雲壁六字

圖識曰自貞女炭渡小溪轉一崖循溪而上至此鄉人多來遊取魚余初名雪雲溪問其稱名卽白雲潭云

鳴玉瀨

鳴玉瀨茅五曲也由白雲潭循溪而上轉數百武溪石平衍而懸急作數三層堦低而不高只使水盤折瀉零瀉處如玉零時如珠琮々琤々有環珮之声以是名之云

圖識曰自白雲潭轉數百步為鳴玉瀨此近吾廬山下數家々僕所居也臥龍潭亦在其前云

卧龍潭

卧龍潭第六曲也洞天稍潤溪柳成林一灣澄潭也作
細波於岩下潭上柳邊尤宜垂綸弄釣

圖識曰鳴玉瀨與卧龍潭相接柳邊積水澄泓西望
龍水亭隱映松林間云

龍水亭

龍水亭在卧龍潭西即金公爰居之所因其舊基建院
宇亭金公曰谷雲書院自潭折而西北更進一幘之地
踈松參差嫩莎如金華嶽鎮其南卧龍流其東華嶽即
永平之白雲山而跨在春川作此洞壑自洞口至此直

一泰山長谷才分崖路水居其外而灘地稍庶離落成
村上下平田麥穗茁青頗有田園之趣

圖識曰青嵐山一支逶迤而來地勢平廣水如彎弓
形吾家據其間正對華嶽山臨溪而為籠水亭東望
臥龍潭云

明月溪

明月溪筍七曲也歷谷雲院宇又沂北而上溪在路左
稍西入四五里別有一泐水作此溪由溪而上則過永
平抵京都而地高水淺更無異觀云

圖識曰自吾家西北行為明月溪云

隆義淵

隆義淵茅八曲也過明月溪又渡一溪約進百餘步水更從平岩遠流下

圖識曰由明月溪轉一山厓為隆義淵稍平緩云

疊石臺

疊石臺茅九曲也自隆義淵復行三里餘溪腹漸潤水勢更急激折作瀨逆瀉大鳴累石層臺橫縱置積自此復進數里則乃史吞縣舊基而野地始闢田疇錯落州之內倉在此云

圖識曰又西轉而行左右岩石竒恠水瀉其間稍上

有小塔邊有路由此向白雲巔觀止此云

百潭寺

百潭寺雪嶽之小伽藍也山勢雄偉泉石清壯寺在山中平地一山全局都是土山而泉於兩峯之間者谷成溪下為潭下為瀑總括一洞潭幾滿百故寺以是名猶楓嶽之萬瀑名洞也

永矢庵

永矢庵在百潭上十里即三淵金公極遲之所慕山在其東大乘嶺在其西南有朝元峯北有熊井洞而直朝元峯之北起是庵常處于中取詩考槃之義名之以永

天庵之北為樓而面高明峯者曰玩心其東有坵斗絕而高傍挹鳳頂亭其上曰弄丸西南又有亭曰舞風又東十里而為水簾之洞是一山最勝處置一小架曰滅景往來遊息於斯為六歲而移居壽春之谷雲蓋金公好遊名山水跡遍國中獨以雪嶽多峯壑潭瀑之勝而甚蘊奇不見又有類乎隱者故最心樂之云庵其亭樓皆圯山中人改構一庵仍其名傍鑿金公遺墟之碑

萬景臺

萬景臺在永天庵東南五里自庵行數弓過青龍潭劉洪窟屢轉石棧涉則在灝即五歲庵之後崗萬景坵之

下崖舍輿而筇屐進山脊攀松緣蘿步之益難屢誦東坡搜蒙茸履巉岩之句及到臺上岩頂平圓可坐人數十向東臨眺一山全面盡在瞭下殆如坐歌唄而俯瞰萬二千峰者東南一峯縹緲挿天仰望而不可攀是謂雪嶽之上峯而為一山之鼻祖石色正如雪花撲着黑白相錯土人傳以為山甚高寒四月雪消仲秋又雪故稱以雪嶽或云邦內之山曰白頭曰太白曰小白皆以白名之此山之獨以雪揭名者以石色之如雪故也

五歲菴

五歲菴在萬景臺下四山壁立萬松森列但聞水聲潺

溪鶯塵不到并吳禽鳥之聲而無之真絕世靈境也菴
梅月堂遜世之處公嘗隱居於空山深僻之中春之谷
雲楊之水落鴻之無量皆是杖屨逍遙之地而狎於雪
嶽偏好而久住故法名雪岑号曰東峯蓋取雪嶽者即
古人偏愛楚山碧之意歟公像在菴維摩一人奉以香
火世以五歲神童稱公故仍以名菴云

水簾洞

水簾洞在五歲菴東二十里自庵復尋來路越一岡下
七八里折而向東南過槽潭而入水簾洞天又行數里
巨石盤陀弥滿一洞平鋪者為臺低凹者為湫臺成三

而湫亦三為倚壁而架空者為龕水自東而西轉曲而始湧自上臺流轉三層布散廣石垂其臺巔者狀如珠箔晶簾之掛清澈如矢縈迴如輪轟、冷、深淺殊態

寒溪瀑

寒溪雪嶽之名瀑也瀑在寒溪山故仍以山名稱之山於雪嶽隔嶺而峙殆如內外而山上古有石城、外峻壁橫亘排張高為數十仞廣可三四十武泉自城中流出自峯巔細流而下至壁而大放上如垂紳中如噴雪下湧於地飛沫濺衣乾雷撼山雄渾奇壯雖不及於九龍淵而佳麗蘊藉殆過之九龍人皆在下仰看瀑頭故

自不覺其奇而是瀑也越危奇岩與壁並時人於其上
坐對狎視已減瀑下一半之深而只觀上面一半之境
故從所見處較量似不過四五十丈而若降觀於瀑流
落地之處則可為千仞之高但石确斗絕人跡不及於
瀑底云巖左刻九天銀河四字人之比於廬山瀑者亦
非過語也三澗翁嘗評之曰九龍氣也寒溪態也斯誠
得之矣

麥坂

麥坂在金城淮陽交界處自金城之昌道驛東北行二
十里山開炭坑馳道如砥轉連坡陀上可數里少無嶮

險之處馬忽停蹄下臨無底蓋平行之路到此中圻深
如萬仞之坑西崖壁立相對若可超越乃尋路而下危
磴斷崖屈折逶迤上下七八曲而始到平地大江橫亘
悍流湍急是名連松浦涉江則為淮陽初界數三村落
依崖臨江以慙行旅過此而又復面壁而上其險也如
彼崖行數轉而乃登坦路行者於是地路從阜衍不知
有是坂地忽四陷絕壑當前始乃見之故一名見則崖
而稱之以麥坂者從俗言也

披襟亭

披襟亭在金城縣治路傍未至邑一帷許繚以巨川蔭

以茂林長可十里亭在其中別無登眺之勝而盛夏可
以避暑川有二派北自蓮木洞法水時西自真菜洞合
流至邑前西南而為大川崇禎乙亥潦水漲溢民居多
漂縣令洪公霆築石川邊導水安流仍植雜木於堤以
防水患邑以之安堵樹為之巨藪於是乎亭起焉金城
為楓嶽縮轂之口而之楓嶽者自京而北陸走二百餘
里及到金城始見小亭於長林之中欣然登臨得以聊
清風而滌塵襟則雖無幽賞詭觀之可淹留亭之名顯
於世也亦宜

斷髮嶺

斷髮嶺在天磨山距淮陽府一百五十里卽金城淮陽
分界處蓋天磨山一脉北趨為嶺路極峭峻詰曲如羊
腸左右叢薄相陰暎行十里始達其頂檜亭石砌可以
坐憩望見楓岳諸峯挿地特出自毘盧以下歷歷在眼
前洪仁祐記云登嶺望楓岳則銀鑿玉峯雄盤特峙宛
如漢王系義三軍縞素層巖置嶂聳挿危列奮若項王
臨陣鈞戟相向蓋記實也諺云登此嶺者思欲斷髮出
世故名嶺上有五兩洞中有泉味甚甘冽旧說有人
採得荃極重五兩者於此故遂以為名是嶺也仙嶠之
高鑄而荃即肉芝靈朮之類昔秦皇漢武巍然以萬乘

之尊尋仙求藥祠竈祭時舟車冠蓋相屬於海上而終
未有得驪山茂陵坏土已乾何物村豎野姥容易掘取
於泥鋤薪鐮之間乎

長安寺

長安寺金剛一山之門戶也自斷髮嶺行五十里踰鐵
伊嶺東循山腰又北折而行川回路曲涉萬瀑下流一
水而允九渡乃至于洞幽而敞廈而曠山始竒水石始
清松檜成行峯巒森朗悠然有洞天之趣見其堦祀
可以知堂室之雄麗也少進而渡萬川橋入寺門外揭
海東茅一名山大刹八字扁曰長安寺茅二門曰相隨

茅三门曰真如茅四门曰天王法堂曰大雄等三殿四
聖殿暨龍舫庵而為樓者二曰泛鍾懸大鍾于上晨夕
撞之以警衆曰神仙近世所創翼殿而堂為寮焉曰溪
水曰說禪曰寂默皆極輪奐又其側為厨竈廊廡庖湢
之屬以供炊接賓刻木引泉承以長槽斷續琮琤如奏
鐵琴仰見群峯離立倒垂凜凜有欲墜勢其最北曰觀
音峯次東曰地藏峯南曰長慶峯楓檜被其巔微風刁
刁送濤声怡然惺心頓忘塵囂古稱堂殿佛像皆中國
人所造而問諸僧則但曰創於羅代律師真表重建於
懷正而已亦無能言奇后法興故事者

明鏡臺

明鏡臺在長安寺北五里左右石壁周遭如屏自左壁斗起一石峯竦拔雄峙面背削平不偏不倚屹然中立頂戴黃石高幾數十仞平行如展布帆圓明如掛菱鏡石膚岩色清亮明淨故名曰明鏡臺。下十餘武大石偃臥與明鏡對峙空山無人法輪常圓謂之玉鏡臺亦稱業徑下有半畝澄潭水從靈源洄伏為潭臺影倒蘸成紺黃色名黃流潭一名黃泉江又有石城故址小竇如門稱以新羅王子避世處云

靈源洞

靈源洞在長安東北二十里自明鏡臺前行六七里山
益峻逕益仄路傍巨石呀然作广名曰迦葉窟大刻靈
源二字是為洞口也一路盤互轉入深谷老木楮運壽
藤絡石殆無移步之處穿越度壑如蟻旋磨少進入洞
洞天軒豁幽邃可為內山福地之最環洞皆石也拔地
奇峯屏列前後累々而峙者曰十王峯軒々而立者曰
使者峯屹然而聳者曰將軍峯頎然而拱者曰童子峯
平鋪如席者曰拜石臺尖圓如筆者曰沃焦臺挺角欲
觸者曰牛頭峯舊鬣欲嘶者曰馬面峰秀削嵯峨拱揖
環湊中有小伽藍占據夷曠臨眺間敞紙窓紆幃一塵

不動是靈源法師習定之處因名靈源庵泉溪有聲不見其流松檜送籟共梵唄相和洞中宗生孳木都是楓林而霜信後過華彩纈眼玲瓏炫煌如披錦繡而施丹青茲山之盛稱秋景由是為名而茲山之中靈源為最云

門塔

門塔在百塔洞口蓋自玉鏡臺繇首王宮行里許而為金蛇窟又三里而為百塔洞口自此可徒不可輿前七八里而涉般若古磴一盡而過水簾洞佳石之累如塔形者始錯落隱見於叢間迤而北西厓層積對立若門

大書于上曰門塔

證明塔

證明塔在門塔上數里由水簾洞夾門塔而行飛湍急
流曲，琮琤至最深潭下有双塔左右突峙累積層疊
望之挿天以隸書大刻曰證明塔自此直從右谷越一
麓則又有無數白壩自青蓮庵遠望洞中諸峰如白鶴
群聚形甚奇恠云

百塔

百壩在百壩洞最深處自門壩之左右前後有石皆成
壩形玄岩直矗立節，堆摺頂尖如兩傘，因者在門壩之

後名多宝塔又其後白石撐立像若窳堵波名多真塔
通多真塔行數里而證明塔之側石壁枕流層、若支提名
温塔過温塔緣洞左轉行數里山漸高運轉仄中開一
洞盤陀巨石橫臥于喉上刻百塔洞天四字洞中白石
在、成聚或高或低或大或小彌望森列如鋪甃上有
一塔拔地突起四無依附約可為三四百尺塔級圓整
雕鏤奇妙其色白錯以黃黑小者亦十數丈或六七丈
周廻環擁若軍校之衛渠帥也自明鏡如塔形者搃而
較之不知為幾十而舉大數曰百塔按宋書曰阿育王
塔即鉄輪王佛滅後一日一夜役鬼神造八萬四千塔

疑此壻亦羅代名僧役山灵造成也歟

鳴淵

鳴淵在長安寺東北五里卽萬瀑下流也自長安過神
仙樓折而東北行兩壁盤行一蹊中分亂石鋪底礪礪
錯落取途間中以石爲路或夾而過或履而度之玄屈
曲行百餘武數丈飛泉從宕之稍坳處直墜于淵如雷
鼓激々有聲渟泓深黑不見其底僧言淵中有窟垂一
團絛亦不徹底蛟鼉時出害物淵一名金同淵金同者
麗末居士也諺傳同挈妻子入山等菴于淵上其懶翁
爭道懶翁刻妙吉祥同精之率徒众持鉄釘期欲劈破

天忽大雷雨驅同沉之于淵同化為蛟螭水為冤鬱有時悲鳴故名鳴又曰鬱悅或稱鳴韻潭

三佛巖

三佛岩在表訓寺西一里巨石當路縱廣數丈前列釋迦彌勒彌陀三佛像後刻居士比丘各一軀前是懶翁師惠勤刻後是金同刻其背又刻小佛六十二軀僧言懶翁刻三佛時金同約刻五十三佛而加以九像蓋務勝也

白華菴

白華菴在三佛岩之上菴於近世遭魔火只墟耳有六

浮屠四石碑浮屠則清虛休靜零月敬軒就進義荳鞭
羊彥機虛白明照楓潭義謹敬軒義荳彥機西山清虛
之徒明照東山松月應祥之徒義謹鞭羊之徒碑則月
沙白洲白軒靜現齋之文書則義昌公子東陽都尉吳
竹南朗善君之筆穹碑顯刻照映山門地之四圍忽皆
土山而石嶂岩峯一無所見左右稚松夾路成林平穩
幽雅宛有林亭之趣白華生詩也序以為孝子之潔白
禿頭之去孝為達者能不泚頰也乎

表訓寺

表訓寺在白華菴上金劉之茅二道場也新羅文武王

時義湘法師自五臺山移錫于此弟子神琳能仁表訓
三人各結夏就之神琳能仁兩菴古有今無唯表訓寺
歸然獨存為山中巨剎雄傑軒敞與長安將而地勢之
寬曠輪奐之華麗反有勝焉法堂安曇無竭像扁以般
若華嚴經云無竭常說般若經於眾香城故名也殿宇
南瀕佛座向東僧言此地象行舟形佛坐須若坐舵然
不然則有笑曾以佛座向南被萬曆乙巳大水圯更新
之座以東向云其言詭矣亦堪輿家說也

萬瀑洞

萬瀑洞在表訓之左洞踰萬瀑猶川名百川萬瀑之源

有五一自毘廬峰之東一自毘廬之南合流于內水岵
一自萬灰菴之南一自摩訶衍之東合流于穴陞峰下
一自舩菴之西合流于穴陞之北至金剛臺東南為萬
瀑洞即金剛一山众水會同之處也洞府雄偉峭壁四
圍大小香爐峯為其門戶五仙之峯青鶴之臺斗絕對
峙危巖障其中須弥八潭二洞之水從青鶴臺右趾交
噴清駛到北西条界破觸石澗雷殷雪翻很雷殷雪翻氣雄勢猛
山谷震盪雷殷雪翻晴畫欲暝洞底崖脉散為磐石鋪彌一聲石
皆膩滑平整如張筵席石面鑄蓬萊楓徽元化洞天八
大字大如箕奇崛飛騰殆如龍拏蛇走是楊士彥之

書云繇洞口徑北而上則為八潭水蓋清石蓋潔上下
十數里純以大磐石為底而众水之奔流者皆因石成
形遇崖嶽為溜觸槎牙為瀨平則為川窪則為泓或噴
歇或滄瀟或布散或曲折其狀不一不可勝名而蓋水
與石相搏多成等折故瀑為竅多而洞之名亦以此也
瀑之所受又自為澄潭故選其竅勝而有八潭之稱曰
火龍曰船曰龜曰真珠曰噴雪曰碧霞曰黑龍曰青龍
皆象形而名之爾然其形聲之度則無窮也又有白龍
潭琵琶潭洗頭盆者與八潭相先後水石俱極奇麗而
或稱九潭或云十二潭蓋潭無定數而古所傳觀音青

黃琉璃諸潭今不識其處火龍舊以雄大名變為淺瀨
諸潭各擅其長而真珠噴雪為尤奇碧霞之上又有凝
碧潭雄渾深廣皆可愛也至火龍而万瀑之洞窮焉或
者以八潭萬瀑分而為二謂八潭別為一洞万瀑淺近
不副其名則謬矣須彌水石其顯未久也故願自為一
洞而實亦万瀑上流也

噴雪潭

噴雪潭萬瀑洞之第五曲也自萬瀑轉折而上過青龍
黑龍碧霞三潭更上數十武地形傾倒水聲迅怒清激
如矢索迴如輪迤流石罅轟々冷冷從石崖滾墜而仍

又直撞于下噴沫如雪聲振林樾盤石平廣可坐數百人傍有石嵌上穹中嵌實合避雨其珠潭俱為一洞之眉蓋八潭同源而異體紅潭之整圓龜潭之悍駛噴雪真珠之瓌奇雄渾碧霞青龍之昭明沉静可謂各擅其長而集众潭之奇格兼有峯壑之秀拔者莫如噴雪珠潭也琵琶一曲亦晶熒渟滯自是不易得者而漏於八潭之中梅豈不如蘭杜而不載於屈騷歟

真珠潭

真珠潭在噴雪之上最奇處也潭底四五畝潭上石欄橫截水後欄墜飛沫四濺迸如千斛珠璣石亦皎潔步

步凝滑可為八潭之冠蓋金剛水石之奇勝莫尚於八潭而八潭之氣象雖不一要皆昭瑳瓌奇圓整清逸譬如方丈在前濃淡酸醎之各殊而均之為珍羞美饌見者隨其性之所適而甲乙之可也然八潭之奇勝在峯巒佳處自青龍以上青鶴獅子穴望香炉之類迭出暎帶與潭瀑爭雄至珠潭則众香一帶平正斌媚望之可掬使行者仰觀俯窺不知所以應接此是珠潭之擅勝於萬瀑而噴雪以下莫敢望焉者歟

普德菴

普德菴在噴雪潭上自黑龍潭可以望見而至碧霞則

狎矣欲上者由雪潭取友逕攀絕壁而登石磴螺旋猱
懸匍匐而上幾十級足踏如心休如視瞿如也磴盡
而為堦、窮而為窟、中架小菴上支石广下翼其簷
前檻則出巖外無所附即承以一銅柱支之柱凡十九
節籠以大鐵索釘于岩風吹則薨檻俱搖簷桶柱檻皆
用鐵鎖鉤連之以防顛跌其險絕如此而後軒濤俯瞰
豎柱處令人掉慄庵中坐一小磁佛窟傍有墨無竭石
像壁上有記曹溪禪宗衍之述也筆勢翻、頗有文苑
之氣味可讀也庵名現音罔高勾麗安原王時普德和
尚所創故亦名普德庵僧言普德古聖女名云

內圓通庵

內圓通庵在萬瀑洞西十里由此可登須彌塔之塔者
必於斯休憩庵在山腰最深處幽夔爽朗不類人間世
岩巖之拱護洞府之深邃可與靈源伯仲而萬瀑水聲
遠在空外令人久坐飄然絕塵想也洞外有青鶴五仙
兩峯如相拱揖二大川到庵前合而為一從兩峯間出
原州橫城諸山亦在几案間儘名藍也外山有圓通庵
故稱內以別之惜其荒廢已久僧徒無一居守者

須彌塔

須彌塔在圓通庵西十里由萬瀑溯流而上到青鶴臺

奇岩峭壁澄流皓石滾滾不絕水之奇者曰青壺淵曰
龍曲潭曰槽淵過此則圓通也自圓通東北上得清泠
潭樟頂嶺南迤東折為萬折洞又東為太上洞又東北
為清泠瀨慈雲潭又東轉為羽化洞西有沉香石奇
而峭前為三峯中特秀拔又向東而上為赤龍潭降仙
臺之東北望見土山婉秀是永郎站也蓋自青壺至
此水石之奇勝指不勝屈而太上為上槽淵次之龍曲
萬折又次之青壺之流為双瀑溢而復瀉羽化之屈曲
成潭氣格蒼老可與八潭相伯仲清泠慈雲亦可以濯
清弄漪降仙以上則奇石益多鋪者為磐立者為壁狀

皆層疊方正若相輪然者布絡連亘殆三數里然後頂
踊之塢見焉高可六七十丈下底而上殺巨石覆其上
如簷又以圓石標其極層々推摺面々削平齒皆齊整
宛然成級而級為六七十層如用人力而磨礱者然累
石置石或方或圓羅列其傍又或如圉廩而沒于草莽
如髻髻而伏在土穴若於幾百年後土落而石出則瑤
級玉枰吾不知為幾千數矣

歇惺樓

正陽寺在表訓北放光臺下即一山正脉故名或云寺
南臨午位而東受朝陽寺之得名也四以是也寺之樓曰

歎惺金剛皆石也而狎樓址多厚土平坡上暫成數仞
圓阜始至不覺峻極登眺則處高勢豁世所稱萬二千
峯咸在几案每過客登樓寺僧輒舉手曰某峯數其名
以告之亦山中一古事也其雄據東北特立而彌竦者
毗盧而梵語呼毗盧為龍所以尊之也森然如削玉鏤
雪布列而橫亘者众香城而內山之宗脊也其尊亞於
毗盧而傑然雄拔者望高臺也曰長慶曰觀音曰地藏
曰彌勒曰法起曰釋迦曰迦葉曰十王曰牛頭曰馬面
者冒以禪家語也曰遮日墩臺石鷹童子僧床穴登
獅子大小香炉者因其形而名之也曰日出月出者登

此可見日月出也若丞相將軍永郎五仙之屬指不勝
樓也或高或低或遠或近或疎或密或離或附前若近
而後若隨者其位置也平而恬橫而仄僵而垂仰而聳
如樓全如城壁如廩庾如車蓋者其稜角也閑都靚雅
則佳冶麗姝袵飾自持也奮迅跳擲則奇禽猛獸遇人
將搏也森列而矯健則元帥登壇祭戰連營而健兒勁
卒齊聽發放粹麗而奇拔則仙佛朝真冠笏踰濟而祥
鸞瑞羽後先騰翥者其氣勢之大略也樓右土峯穹窿
名天一臺亦名真歇臺橫臨四遠眈然駿矚所見其樓
相似而众香金體益呈露東北諸山眺望稍豁此其少

殊也茲山多楓故摠稱楓岳每當深秋淺絳深紅濃抹
淡粧自山腰以下爛然一色如列繡如鋪錦奪耀人目
朝雲暮日移步換形者色狀之萬變也

摩訶衍庵

摩訶衍寺名也梵語摩訶大也衍乘也亦名大乘庵創
於義湘法師曰頗宏麗屢經廢興今則巋然一小庵也
由八潭潮流而上行里許細磴盤回懸厓紆攢窈若天
中天密如果上果谷窮而洞呀蘭若冠峯巔松門蘿幌
梵住蕭灑窓舒意葉室度心香慧雲瓊露濯錦凝珠岩
堯淨潔人世埃氛之氣無從而至前對法起穴望諸峯

背擁衆香城而右有七宝臺節々起伏龜岩為捍門洞
居一山中央景槩絕勝庭除有樹直幹干雲山中人稱
之曰桂然皮葉殊不類且外山徃々多此樹故皆以為
非是曾見南秋江記有曰摩訶前庭有草其葉如韭其
花少紫昔天竺術士指空入山頂禮草生其地至今不
衰仍呼為指空草云此亦不可尋詰而山中大抵多佳
卉奇木安知無菌桂產於其間也庵後有峯曰迦葉由
迦葉而東未數里有萬灰庵々之興於諸寺最古幽絕
過於摩訶又東六七里而為白雲洞其上有金攀鐵索
而上百許步可達其頂與衆香城最相狎又東下二三

里得佛地庵有泉自岩罅流出潺湲不絕飲之甘冽名曰甘露水

妙吉祥

妙吉祥在佛智庵上百餘武路倚赤壁環立雄峙高可數十仞廣居高之二前平若垂障上穹若加厝中鑄大佛像盤膝趺坐像甚魁傑與壁相称其鼻如削甕其耳如垂箕淫之儼然僧言文殊菩薩像而法喜居士詩云佛智庵前石壁間誰復新彫大弥勒據此則似是麗以前刻也前列光明燈倚刻妙吉祥三字是尹尚書師國之書而三字之大可與佛像等

鴈門嶺望毘盧峯

毘盧梵語至高之義毘盧菩薩在諸佛最尊而峙於金
剛最高故稱毘盧峯有岩紋又為嵐霧斑駁凝如雪色
故名皆骨而佛家以清淨法身謂之毗盧峯之名亦以
此即金剛內外山之祖宗而右為內山左為外山聳拔峻
極雄蟠東北余於丙子春入山宿摩訶衍向東行十餘
里歷毗盧庵四址北踰小崗或步或輿行蔓草中又進
數里洞漸深遂路轉幽險賈勇而上小毘盧峯亂石鋪
地底空虛蹈則石動岌々欲墜石傍徃々多穴竦身
超越如是行八九里峭壁傑峙下臨無地矮招強栢蒙

俗石間自此路雖不層峻左右窄狹如行屋脊上猿懸
揉升毳到絕頂向所見萬二千峯皆在膝下俯首伏脊
泯若平原遠眺渤海杳如一勺北則白頭羅漢近控肅
慎女真四界南則萇山毛羅遙接靖蛉懽斯等疆西則
郡城西河洋路直通大漠東則扶桑析木只隔一帶負
海古所稱十洲三山九都大瀛舉在我指端但恨目力
有窮仰視頭上去天一握却顧來逕仙凡迴然不佞始
覺身在半空晤焉茫焉神為之益爽膏為之益豁自今
人有小朝鮮之意蓋金剛之山雄峻秀拔甲於東方而
其來則根於長白奮於鈎山橫亘於鐵嶺起伏於楸池

蟠結而為此山突起為凌灝峯猶雜土石、壘重、而去
騰躍為永郎岵又忽然聳拔為毘廬則湧全石為峯直
干雲霄豐隆負負賔無與之為敵者其降勢峻嶒嶙峋
則众香城也翠壁蒼岩環列為城石色皓皚望之如粉
堞然石間生檜栢海松蔓香等樹茏然成彩迤延為日
出月出諸峯橫列其下則為白雲金剛臺大香炉小
香炉其川則為萬瀑洞會百川洞南出淮漢之上流又
西去為望高穴望其高次於毘廬又次之為白馬懸燈
諸峯若將西南而俯者又南出傍海而馳去莽蒼為天
吼雪岳寒溪其西南去者互臺也直南而走者為嶺之

左右湖之西南之根幹也。毘廬以西謂之內山，骨真立迎西風而受夕日，松檜不甚長大。毘廬以東則山間石土脉頗厚，朝日照之而近龍衣海氣，萬木萃長翳日，干雲謂之外山。其東支去者不百里至東海而盡，其西支夾淮水西，未至少海過楊江而止。半千里而近其北支層壘疊嶺，盤東而為洞壑者為九龍淵。其萬瀑洞則岩厓奇秀，水石清勝，杖屨可涉，為遊人賞客之所。來往九龍淵則窈冥深險，幽昧不測，為龍螭鳥獸之宅。白日風霆之所起，恠物之所見，人跡所罕到也。後十年復入茲山，老矣且病，恨不理短筇，携冠童更登毘廬之絕頂出。

雲霧臨風而覽山川之紆曲撫四極而揚灵行到鴈門
嶺上望見崢嶸之秀色省識其此時此景志吾之甚衰
也

隱仙臺

隱仙臺在鴈門北五里自鴈門而下路漸夷山亦少
骨行里許千仞絕壁屹立路傍望之如浮菴是名七宝
全由全後麓迤入數弓路又斗絕石峯傑峙攀壁匍匐
行乃可登其頂則滄海在履底原野墟落近如指掌
對眺蒼壁圍繞周遭如展大屏飛泉從巔瀉下如飲虹
垂練者十二級層曲分明可數崖峻無蹊不可以狎

視但自金上遙望不知其水之所由來亦不見其所止
意窮源則必益有奇而山僧諱之入其中者輒自屋而
返云

曉雲洞

曉雲洞在隱仙臺東南五里壘瀑洄駛金石盤陀成一
澄潭水渟滃其中係淨如玻瓈有石竇窪而如盆嵌而
如臼者凡九山中人言古者九竜所宅榆岵興畏佛灵
徙居神溪上流卽九竜淵是也故取竜歸之意名是洞
曰曉雲云

外舩潭

外舩潭在曉雲洞里許自洞循溪而行多得奇瀑澄潭
過四五曲有巨石窪然中陷如橫舟前唇哆而微牙水
懸注其中與四隅平則由哆而瀉復遇石當哆如唇之
有齒若將防其洩者以故亦不能疾瀉從其間演迤而
下為一臥瀑圓潭雖小亦霽霽不見底其奇巧清壯
比諸內八潭之以舩名者反復勝之內潭是一葉扁舟
此則朦衝巨艦也石欄刻舩潭二字洞天幽巖峯巖匿匿
松檜翳翳坐弄清漪塔然忘改蓋外山之有茲洞如長
安之有靈源而水石之最佳處也由此而上可以登萬
景臺訪九龍洞云

榆岵寺

榆岵寺外山之大伽藍也距表訓一由旬過舩潭行數
百弓闢一洞天跨大幹正脉而為榆岵寺、據金剛東
麓之中厥位面陽萬山拱護百川會同而中間一區前
坪足容萬馬可以為陽居可以為陰宅真山中第一福
地也寺之初在漢平帝元始二年新羅脫解王之元年
有金佛五十三軀自月支國乘鐵鍾浮海而泊於安昌
縣、宰盧偕躬迎瞻礼初是寺而安之其詳載法喜記
殿宇之宏麗門庭之軒敞庵寮位設器用之備加于長
安表訓沿溪水石無非淨界仙區翠厓紅葉輝映左右

光風霽陽助人清明之氣天下名山僧占多者信不虛也寺前架溪而樓曰山暎正堂曰能仁寶殿文楣藻井極精緻內設木假山螺旋虬盤奇形怪狀嶮峭礧砢以像天竺枝端層層安五十三金佛長不滿尺庭中立十三級石塔上層鑄銅以豎奇巧入神右有無烟閣爨之不見烟閣中安銅甌于鑊甌容百斗米鑊之大稱是閣外有烏啄井寺曰無水群烏啄地泉忽湧出故名云

神溪寺

神溪寺在高城治西三十里距榆岵八十里自榆岵踰狗嶺過百川橋迺復從大路行至于神溪寺洞府之寬

曠山川之明媚反復勝於長安而寺初号新戒後改以
今名神溪之水發源於毗盧與榆岵之水合流入于海
每於水生之時海魚浮上而神溪之水魚不敢上以是
謂之神溪云神溪金剛左麓也外山之多岡者至此而
又峭拔清秀異內山爭奇恠而長安表訓榆岵三寺皆
天作佛國俗人難以居住神溪則山中結局處奧勢阻
巨川徑偉村閭亦是生聚前臨大路不如狗嶺之險左
夾溫井嶺一路直通京城信乎可居之地也寺之初纔
百有餘歲而自鉢淵廢後是寺始興云

鉢淵在神溪北十里偃瀑四五級窪為淵圓如盂故名
西壁有楊蓬萊書蓬萊島三字淵上有寺址虹橋尚宛
然西有不思城險峻且固誠一夫當關萬夫莫開之地俯
臨東海通豁無際亦絕景也

鉢淵馳瀑

淵上有盤陞大岩瀑流卧下昔有真律師跣趺坐馳於
瀑流終日不輟蓋寓定心之義後因之遂為山中故事
名曰馳瀑今廢

玉流洞

玉流洞在神溪寺之北九竜淵之下路由寺右行長谷

中亂石壽藤交絡如織。少上有大石當道。若無蹊可尋。
諦視則石底呀然。有竇。旁容人冠。中非此則無以就道。
然頂匍匐宛轉。乃可入。由是而逶迤行。數武竇始窮。乃
復得地而蹈。磴蓋危石。蓋滑。逕又往。中斷以木棧架。
虛通人行。履之若將崩。摧揭溪而涉者。且不知為幾十
數。其懸度之艱如此。然水石之勝冠於外山。自谷口已
多奇。岩異泉應接不暇。至過仰止臺。則曲曲可以沿弄。
坐忘起。忘行不如此。亦不能忘其疲也。如是者幾十
餘里。乃為玉流洞。四圍蒼崑如鋪錦。屏大盤院。金石
彌一洞。無缺無罅。水由仄壁下折旋。迴散。既雪翻。鷺混。

矣又澄潭以渟之清漣為一鑑大石立潭心西面削平
望之若巨艦掛帆天容沈寥雲物鮮華咸以影敞之臨流
濯纓自無一點塵想方之內山可與噴雪碧霞爭奇石
面鐫玉流洞三字楊蓬萊書云

飛鳳瀑

飛鳳瀑在玉流洞上五里石壁側立高可百仞層層如
階級瀑自其巔縹緲遊空而下灣々激々搖漾回旋流
亟而不悍淖遠而不駛亦懸瀑之奇變者人或以水細
不能敵壁之勢為欠而却不知水細故不悍不駛能作
奇變之態蓋此瀑不幸在於九淵一喫之地人之觀兩

瀑者只自眩精奪魄於九淵之雄且壯未暇細玩於此
此何異於貪梁肉而不知香蔬之味乎其左又有舞鳳
瀑卽玉洞之上流而亦奇絕稱

九龍淵

九龍淵在飛鳳瀑之上自玉洞行十餘里石壁巖崿截
往，縛橫枝於壁以爲階無是則足無所附升降咸由
之屈折盤回凡踰三大梯兩小梯而磴窮路轉呀然洞
開四圍碧巖拔地撐空右崗益峻頂凹如門又似馬豎
双耳瀑由双耳間瀉下四分一附壁三則離壁望之如
白龍遊雲明虹飲河砰礮噴薄鼓怒觸抵雷奮電掣雪

翻電散漚沫飛跳山谷振盪自巔至下約可為千尺其
從亦然而瀑居其半下有巨泓其深無底以全石為嵌
以受其瀑方其瀉而鑿也未茹而旋吐奮盪聿轉令人
眩悸淒淅之氣直射人面目凜乎不可久坐也志云昔
墳九童所蟄之澤童移于此故名或云瀑從八潭流序
居九故名法喜詩云九童各窟千尋碧據此則八潭與
湍疑各有一童也湍之上又有巨泓凡八謂之內八湍
此湍即內八湍外八潭之間也欲觀八湍者自瀑頭而
上則無所取道須從毗盧路上可以窮源亦多殊勝然
鳥道深峻游者又鹵莽絕無至者但從玉流湔上僅窺

外八潭而諸淵之勝只望見其遠勢云

萬物草

萬物草在神溪寺北二十里自神溪歷溫井葛田行二十里一枝石山逶迤摺疊至末而為獅子岩特起高峻攀援乃上俯瞰洞中峰巒環湊嶙峋嵯峨石角分裂叢立拳起釘鋸布列粉玉皓潔大小尖鈍皆有人物之狀恰似巨匠聚石為山巧施鑿鏤此萬物草之所以名也夫山也而名之以草何以其形諺々如草茁也或稱萬物肖々者似也謂其似萬物之形也又曰草鈔也猶云笨套盖有草本然後乃成正本也夫天地一爐也化翕真

宰必先觀法於草本而翹肖蠢蠕各賦其形如治者之
鎔金必先觀法於範而大小方圓各隨其形故自古及
今物各付物如印一板凡世間之芸、織、者萬物之
正本也山中之形、色、者萬物之草本也萬物出乎
震、者東方也故萬物草本不南不北不西而在東海
之東其地則曰資生洞即坤資生之義也艮山也萬物
之所成始成終也故萬物草本非金非木非土而以石
為質以山為體成言乎艮之象也乾之策二百一十有
六坤之策百四十有四二篇之策萬有一千五百二十
當萬物之數今夫金剛之為峯萬有二千者所以應萬

物之數也。淵乎博哉造化之妙也。若無萬物草則雖化
工無以施其妙矣。善哉古人之命名也。直謂之範則恐
其太洩天機。故乃以一草字微發其端。亦不盡言之義
也。

甕遷

甕遷在通川郡南六十五里。東人謂棧曰遷。石山枕于
海。形類覆甕。路由山腹才通一線。聲確屈折。鑿人趾武
下臨滄海。怒濤盪滴。崖石掀簸。點點峙浮如浴。鳬出
沒波中。目之所窮。只有微雲淡烟。其天無極。而巨浪顛
波往來拍擊於脚下。時值夕日射海。盪潏澄空之色。崩

塌洶湧之聲與山光谷籟相映發疑有河神水祗翻騰
潛吼而波底群鱗若將左右掣攫人也甚可怕志曰倭
寇道此官軍擊之盡淪于海一名倭淪遷云

百鼎峯

百鼎峯在通川東南五十里自朝珎驛向西而行數里
始從山脊更轉線厓前進七八里磴道懸急石角嶮岩
又多傾仄捨輿携筇而上數弓復輿行二三里始達峯
頂地頗平鋪衽作層臺而全西或高或低者都是骨
立之岩之前後上下或窪或凹大者為鑊小者為鼎為
錡為釜曲曲彌望在在皆是數不可計而舉大數曰百

鼎窪之內圓潤且大水盈不竭岩之後如舟樣而水稍深者舩潭也潭之後岩開一谷僅容數人首尾為十餘間者釋王門也門之半有石為圓不過數尺而以杖叩之則鼓冬鑿如鼓之響門之西有錦繡峯之南有文殊峯兩峯俱峻極不可階而文殊最高遠近大小諸峯尖矗皓潔羅列如兒孫其狀不一內山諸峯皆坐其下而仰視此則在上而俯瞰千態萬形盡入吾眼下實是金剛之所未有也朝野僉載云辰州東三山直上夸父與日競走至是支鼎煮飯疑三山乃支石而此峯即夸父鼎也

千佛洞

楊蓬萊千佛洞記曰豐岩西三十里有溫井、西六七里有鉢峯、頭有玉女洗頭盆數十鉢之西二十里有溪透一石門而出者尋溪入門行可五六里其中空洞寬暢玉峯周遭瓊厓四圍作一大洞天更無一拳土一凡草洞中盤陀雪布凝滑如冰者數里林立羅布皆有
人物之狀厥數不知幾萬億雕鏤刻畫鏤鏤琢磨盡皆生活見之驚倒諦視然後知其為石也人則有立者坐者臥者起者對而相揖者携而牽挽者端拱徐趨者疾行揮袂者騎牛跨馬者牽羊牧猪者僧而焚修者儒而

聚講者軒冕而朝其君者環佩而序其班者闔力而較
勝者售強而賈勇者帝王臣民尊卑上下大小凡民心
情色相靡體不具物則有童有帟有麟有鳳形飛者像
走者類皆數百而或翔而騰或翻而下鼓翼而舞歛翅
而唼仰而叩俯而啄或走而去或奔而來相逐而蹄相
交而群卧而輾趨而驚固不能指點為某物而抑有大
於是者重巒疊嶂駕虛凌霄窺如九闕之巍峩經星緯
宿拱躔圍辰彷彿三元之軌躅瞻望凝儼不覺起敬而
拜跪意者造化翁陶甄人物之時起草於此洞而然乎
古人遊楓嶽者何限而曾未有一字語及此者知其跡

之不曾到也噫不見此洞而雖談金剛之勝者何異於
不割璞而論荆璧也若有繼余而至者知吾說之不浪
矣

按此託盛言千佛洞之詭異幾謂之甲於金剛而蓬
萊之後更無繼至者豈東坡所云漢工水師雖知而
不能言所以無見之者歟或曰千佛洞即萬物草是
也而今所謂萬物草亦無彷彿於記中所言者抑別
有其地而未之尋歟潛確類書云彭水之上有卧佛
岩狀頗瑰奇古人見一佛岩猶載之於書夸示後人
雖千載之遠万里之外令人艷想况一洞中岩石之

行、立、者俱是僧形佛像而數幾千計則豈不奇
乎異哉龔慕苟能復向於山中尋真而一見則記之
而夸諸世之排佛者曰自西儀剖判以來天已為佛
立像於東海之東

叢石

叢石在通川郡東北二十里海邊白頭山一支西南行
為荻藤形始細終大越海至通川北為圓阜圍海斗起
橫而左散為叢石環海門數里頭、駢立或層疊相附
又如縫合而成者其立者卧者橫者歛者長者短者折
缺者嫩細者雲委雪堆叢積凝連於岸上水中而其稜

或四或六方直平正如繩墨而削成雖高至四五丈者
亦無上下置殺之別特高而離立於波濤之間者有四
曰四仙峯世傳永卽之後四人遊於此故名亭于阜上
俯視玩賞而石之列在水底者去水猶未遠亭雖高不
足以悉見其奇必舟作海上下沿洄然後縱橫積散
者無一遁形有方不同而其為六稜之削成者未或不
同亦奇矣伏在土中者或微出稜角累々皆然殆不知
幾萬億叢石豈有石之初造化者之所為歟亦不可詰
矣

喚仙亭

喚仙亭在叢石亭南岸對眺散石綦布籌錯萬狀詭竒而卧者尤多兩亭之間洄成海曲絕壁之列立者如環屏竒岩之特出者如束筍由西岸而下白石磊落大如起塔小如覆甕者不計其數越左麓而有孤霽村湖山明麗地勢寬平海戶浦村曲々結隣石渠板扉繞以柳桑浣女釣伴笑語閑靜可營一區菟裘而斯不可得矣

頭白津石

頭白津北六七里有石蒼然在沙岸畔若令南宮見之端合袍笏拜之尚無名稱物之遇不遇亦有數否

穿島

穿島在叢石亭南海中六七里島之奇以有穴，俗
自西而穿達于東入其中然後見天光暎露海波盪
也故非小舟不可狎視穴之廣十許尺高可達數丈旗
上下四旁叢石細嫩其懸立壁上者如螺蚌出殼石皆
墮水中只有石衣垂々相黏附此其所以尤奇有魴鰈
徽立見舟影揚鬚截浪而去

金欄窟

金欄窟在通川郡東十五里有峯穹窿在大海中峯有
懸厓，有深窟廣可七八尺四壁低合水氣常浸漬故
石皆斑斕如袈裟金欄上下石壁猶叢石而小異其精

草
細竒絕又勝於穿島有草叢生四時常青潤俗謂仙人

侍中臺

侍中臺在歙谷縣北五里脩崗逶迤東盤三面皆湖水
瀕漫漶大瀛環其外陞之無涯溪湖海之間蒼然
多秀松有小島錯落森列於海中者七故臺之曰名七
室韓上黨明澮巡過到此拜相之命適下改今名臺上
曰有亭今墟云

三日湖

三日湖在高城郡北五里平原一脉迤入水頭如蚌吐

舌蒼松夾路枝榦糾結連亘兩岸一望葱蒨策馬樹間
陰森寧籛不辨前頭有奇覲忽到松林盡處平開圓湖
是湖也匯于野輪六七里廣三之一望之若無涯涘渺
漫平恬微瀾淪漣如也奇壑之遷迤環列者三十有六
窈窕明媚能使人怡悅蒼然巨岩湧出湖心自成一島
亭于岩上縹緲蕭瑟可為仙人之桺遲羅代永郎述郎
南石行安詳四人三日遊此故湖曰三日亭曰四仙也
湖之南有小峯上有石龕峯之北有厓有嵌之內
有六字丹書曰永郎徒南石行世傳四仙題名處字漫
漶只可卞南石行三字外山名區雖多而至於窈窕佳

麗此實為最而可與鏡湖相甲乙也晴峯六々歛螺蛾
白鳥双々弄鏡波三日仙遊猶不再十洲佳處始知多
崔簡易亭上之詩也鏡裏芙蓉三十六天邊鬢髻萬二
千中間一丘滄洲石合著同來海客眠楊蓬萊湖中之
詩也

夢泉庵

夢泉庵在三日湖北岸初到湖上見亭不見庵蓋亭跨
湖心石島為庵前案而遮之耳欲之庵則一水兩渡僧
輒棹小舟作伊軋聲自叢薄間出迎望之如畫圖中始
自松林乘舟登亭又自亭下搖櫓乃至庵佛寮僧室井

井如也寺居湖之北岸而岡支之左右者若彎兩臂坐
於寺則湖面團整如開鑑如鋪穀諸峯益迴合紆密竅
窈者益靚而深明媚者益秀而麗湖之勝固甲于九郡
而非至是寺不足以盡其勝也繇庵後折而上穹阜西
岩對峙如扃大石上覆狀若俯龜入而轉步爲後海波
如對案可眺日月出海金剛七星諸峯出沒於怒濤之
中烟靄以色之亦瓌觀也寺舊無泉夢神人指而得泉
故名泉有三竒介於湖海之間得一冽泉一竒無鹹味
二竒四時不竭三竒

海山亭

海山亭在高城衙後西岡左瞰則溟渤萬頃與天無際
日月之出沒鯤鵬之變化近在於窓櫺几案之前右顧
則千峯萬壑競秀爭流如山陰道上應接不暇滄洲詩
西望山皆骨東臨海不潮崑崙詩東望乾坤浮積水西
來仙佛護靈山之句皆盡之矣前臨南江如襟帶兩龜
巖對峙東西可以規日官衙村舍左右分列朝烟暮靄
陰暎於柳桑之間真山海間絕勝處也世以海山三湖
之勝相甲乙余判之曰古人有以山水喻人者海山如
道人羽客氣宇亢亮心府浩蕩絕無介滯結轡之想頓
有快爽洒落之象其蓋世軒軀凌霄傲氣汪洋悅惚難

以摸狀惟洞賓之過湖李白之騎鯨庶可得以敵之三
湖如女之穠麗者顏和而體整意濃而態遠脩短合度
深淡得宜閑情嫵姿媚人於凝佇顧盼之際古之名嫺
美姝惟江妃洛神庶可得以方之雖癡癲愚闇之甚者
孰不迷魂盡心愛慕而不自已乎

帶湖亭

帶湖亭在高城南江之北岸南江之水自金剛來至亭
下渟滯為潭白沙如布練赤壁如展屏江南村落掩映
林木間望之如畫圖海山四仙之間難為亭也而是亭
也無海山之魁偉四仙之佳治而幽復蘊藉地不甚高

而有絕塵之想境不甚遠而有出世之意比如偃蹇高
人遐舉物表所以反或勝於二亭云

海金剛前面

海金剛在高城郡東十里巖連陸入海奇岩峭壁羅絡
森列於海岸攢疊層積出沒波濤中備極變態由浦口
乘舟夾左大石而放于海沿洄戛壁而北千宙巔崩萬
壑竄竊或出水數尺或纔出水面高下不齊大小交錯
龍拏帟攢雲興霞蔚形々色々奇々怪々依然若萬二
千峯之叢峙者而改現尤為奇絕七星峯在其前洋
挺然離立如擢玉擎蓮萬師峯孑然如長年操舟又有

水簾洞群玉臺欲入者必從水路行四五里始可悉觀其全體云

後面

此海金剛後面也自陸而後田間細路踰一小阜折旋行平沙中由低麓而達于頂礧礧岩壁高聳森列圓者尖者立者卧者沉者露者如抽笋如枯槎以純石為體不資寸土蓋為風濤所盪嚙查滓盡落骨氣層立自成峯巒色皆淡黃間以凝黛鏤鏤雕琢之妙極其纖巧凡石得水而磨光水遇石而成文今以一拳恠石置之盆池猶足為奇況此乎徑曰世界有九金剛而八在海中

此其一耶

永郎湖

永郎湖在高城郡南五里三面環山東臨大海湖面澄平周可十許畝殊有幽絕之趣亦傳永郎遊賞之處蓋嶺以東永郎之名叱、有之杆城南有湖亦稱永郎湖前有九仙峯峭拔奇麗與楓岳諸峯相似

懸鍾巖

懸鍾岩在永郎湖東千仞高峯枕海特立奇岩穹窿如屋其中樅然若虫食山果者劣容數十人法喜記所稱五十三佛自月支浮海東泊掛鍾憩息于岩者即此也

其北又有如柱大石上戴盤陀亦謂之懸鍾處其下石如舡形者舟岩也又如甕形而其中空洞者丹穴岩也傍有玉橋石

鑑湖

鑑湖在高城郡十五里九仙峯下廣四五里圓整清漪如展綺縠其深縈沒膝可揭而涉西挹仙峯東隣大海環之以白沙青松而穠冶窈窕可與三湖伯仲湖上有飛來亭旧址卽楊蓬萊遺宅蓬萊遍游閩東諸名勝足跡無不到至是湖而卜居湖之顛自此始遂號其亭曰飛來東鯨鬚為筆手書其扁飛字先成來亭二字屢書

不就乃以飛字為簇掛之亭齋之壁未幾蓬萊謫海中
忽一日大風起亭齋自開壁上飛字簇飄揚騰空而去
不知所往後考其日時乃蓬萊在謫乘化之日人謂蓬
萊一生精力在此一字故與之俱逝也亭之上有天書
巖上有如科斗狀蓬萊見此而悟書法云

駕鶴亭

駕鶴亭在杆城郡南十里山麓周遭成谷中有潭曰
仙遊周可數十畝南麓一枝斗入潭心頂平可坐小亭
冠其上曰駕鶴古松數株狀如虬龍風至潏然可聽奇
峯層出影搖水面沙渚松林隱映海門崖上多躑躅杜

鴈水中饒尊焚魚鳥幽深窈窕靜若處子世傳永郎之
徒常來遊故名而旧名幽閑亭具思孟詩云須知暗合
幽閑意喫作深閑處子看簡易詩曰海色潭光隔一陂
無風兩段碧琉璃蓋登亭俯潭景槩如此矣

凌波臺

凌波臺在杆城郡南三十里石崗迤入海中或立或卧
鑿削森羅於海岸如海金剛而尤奇恠都是恠石而其
色則黑其形則植牙如齧齧豁豁有孔穴窪者似樽刻
者似槽或若鯨蛇或若蠹蝕又如熊羆牛馬奔迸馳驟
蹄股交錯爭為奇狀不可數計傍有石窟波濤出入驅

撞如砲聲噴飛若雪色亦一詭觀也然及見三陟之凌
波即又茫然自失矣岩面刻凌波臺三字即楊蓬萊書
也

清澗亭

清澗亭在杆城郡南四十五里天吼山一枝迤來海澨
橫開小崗前有石峯突起為層臺名曰萬景臺高數十
仞上有虬松樛互三面海水涵湛澎湃曰有樓今廢臺
南二里許臨澗水作驛亭是為清澗亭及萬景樓墟移
建驛亭于臺側仍揭萬景樓扁而以清澗稱於世亭臨
海數十武而以臺當其隅水中堪嶼先與波浪開却故

不受水害亭宇寬敞俯壓溟渤日月之所出入鷗鳥之
所翔集暨夫漁村烟火天水浩渺者皆在几案水之涯
而在亭下者清徹底可鑑毛髮每風至飛濤亂拍霜雪
四散有湖山潭瀑間意尤宜觀日月出夜卧房櫳聽風
濤聲撼窓牖恍如水宿舟航中未至亭一里海邊有自
磨石自磨石者亂石堆中有一巨石如牛又一巨石覆
之間可容拳而上下石當中處皆有磨磷痕如用人力
為之者然土人以為奇過客亦不得其說然諦視則下
方三稜皆然蓋海波常從岩罅往來故風濤盛壯之時
石亦為其所盪與海波相吞吐自爾搏擊而然也其理

無足恠者

永郎湖

湖與高城南湖同名在杆城郡南五十五里周二十里浸入山谷不見端倪汀回渚曲岩石錯峙水中亦有孤石如點星東麓一枝半入湖中松林周匝日光不漏古有亭今墟亦傳永郎所遊處

繼祖窟

繼祖窟在襄陽府北四十里距神興寺五里自神興謂之雪嶽外山而峯巒之刻露峭秀與楓嶽相伯仲如天吼達摩竅屹然天吼之下繼祖窟在焉窟之前後皆大

盤陀因石為窟因窟架庵，為八九楹而樑楠之外皆石也。從石門而入，內有石榻石竈石井窟之南有石壁立名龍岩下有穹石戴一盤石高大如屋勢重萬仞，然一人搖之輒兀，然動若將歛，墮雖千人撼之亦不過此是名動石古傳泉妙之靈山有石名碧玉球其奇正如此云理之不可窮亦多矣。寺壁上有小記曰：是窟義湘修道之所，東望扶桑鯤海茫，日月浮沈南望雪嶽玉峯千疊列在眼中。洞庭烟波雖曰壯觀，玉峯千疊未曾聞也。廬山雖為道人所爭，鯤海萬頃亦未有也。茲地實兼之云，蓋記勝也。窟後湧出石芙蓉拔地數千丈，自

西而馳來奇形怪狀呈異闢巧者四十餘峯如劒戟如圭壁如鍾鼎如旂鼓如火焰之燦如波濤之涵不一其狀中有一峯有孔如楓嶽之穴網峯每天將風雨則先期而鳴故亦名天吼襄杆之地常多大風以有此山故也僧言此山號小金剛其曰結祖者豈謂茲山之祖象楓嶽也歟

臥仙臺

卧仙臺在結祖窟南十里乃外山泉石之最佳處也脩磐平鋪潭瀑洄瀉奇峯峭巖周遭暎帶殆與萬瀑為敵然岩石之皎潔殊不及矣

飛仙臺

飛仙臺在卧仙臺上可一里而近峯巒石瀑較卧仙更
奇楓枯四繞復覺幽夏北有彌勒峯下石壁突聳森
束其中有空洞大窟曰常架窟為庵云三淵金公嘗謂
飛仙川石可為嶺東中上乘

土王瀑

土王瀑在繼祖窟十餘里巨壁參雲瀑流中劈而下壁
既展廣流不屈曲其勢甚壯無論寒溪殆可與聞先爭
雄若論其高則不啻數千丈海風江月之句唯此瀑當
之東距滄溟不滿二十里祈雨時人有祈其頂者水源

頗豐大旱未嘗斷流自前往來者只從道上泛看一番
稱壯未為之渾發可惜

洛山寺

洛山寺在襄陽府東北十五里五峯山中一名洛伽寺新
羅義湘法師所建佛宇曰祇宏麗今殊凋敗僧徒若而
人僅守香火寺背負雪岳如列屏障前臨大海如展便
面坐寺軒可以覩日出前有梨花臺亦宜眺望臺下有
石門架以虹霓而門庭軒閭儼然一大衙門也

觀音窟

觀音窟在洛山東數弓許海邊有窟中圻其高百尺其

大容萬斛之舟海濤入其中噌吰作舞架小閣于上安
觀音像傳以觀音顯聖處而亦義湘所初也其越岸有
義湘臺、臨海潯悖慄不可以狎視我 翼祖大王與
貞淑王后詣此祈嗣夜夢一僧告曰必生貴子未幾
度祖誕生

鏡浦臺

鏡浦臺在江陵府東北十五里一名鏡湖、之廣幾三
十里水色澄平如鏡而湖雖闊遠而深不沒肩淺不露
沙正似盤匝上水均適平等刺船而行曾無戒心西岸
有峯、之上有臺、之畔有石曰世傳永郎煉藥之處

湖之東口有江門橋，外有竹島，止沙堤一道綴連如帶，為湖海之限。沙堤之外，海波鼓湧，亦不相及。沙堤之內，長松成林，人家隱映，近而俯臨圓湖，光景窈窕，遠而平望滄海，心目渙漾。湖邊梅鶴湖海兩亭，皆絕勝。三面臨嶺，簇羅入睇者，又奇麗明媚。嶺以東，導海上下，據形勝，擅瓌奇，不一其所以。而鏡湖為之最。蓋鏡湖之在臨瀛，猶錢塘之在西湖，會稽之有鑑湖，而湖之有臺，亦猶岳陽之於洞庭，滕閣之於豫章，有是湖，無是臺，譬如人而去眉，即皎麗如西子，尚得為人乎哉。

梅鶴亭

梅鶴亭在鏡浦之東眺望與鏡浦同而但不見海色故
有幽深奧古之趣

湖海亭

湖海亭在梅鶴之東湖光海色略似鏡浦

頭陀山

頭陀山在三涉府西四十五里控臨大海氣勢綿崐山
腰有石井五十高麗侍御史李承休卜居于山中遂名
於世眉叟許公山記略曰六月八頭陀山三和寺者頭
陀古伽藍今廢叢棘中有石塔鐵佛靈隱寺古蹟言三
鐵佛一在黑蓮臺一在青蓮臺一在金蓮臺云入山中

川上皆深松巨石、臨脩潭相對為層臺謂之虎岩後
臺上西行登山厓曰獅子頂石厓下水清石白其盤石
曰石塲岩洞開豁水流石上清淺可涉日夕松影籠
其北厓石臺曰伴鶴臺過此則山皆石前有彌勒峯尤
奇過石塲西北上中臺、為山火所燒移作三和寺最
下中臺在山中川石之衢最佳前溪曰武陵溪北瀑在
中臺上石洞蘄然其下山石平而漸下水瀉石上人皆
躋而遊過中臺攀傳岩壁不得并足至此山勢益嵯峨
朝霞未歛坐石苔現瀑布頭雲梯數層有指祖庵此山
石窮處傍有石窟有麻衣老人土床其北嶺最高不可

登東麓石峯臨淵而止東北次峯東而南下為石麓與
黑岳北壁相對川水出焉又西為三峯與淵上石峯并
峙而西者最高上有石井苔老水清有老松高尺許峯
各三蹊足而上尤不可俯仰不可并立其中峯危石三
重踞一足則搖故名曰動石其下龍湫石如覆甕其大
專壑水積其中深黑不可俯而窺

武陵溪

武陵溪在頭陀山中頭陀一支起伏而東又屈折而南
豎成一峯、下地可四十畝在澗北隆然而夷有寺曰
三和新羅祖師晶日所建也寺之洞多佳泉異石茂林

壽藤前有淵曰成池，西有虎岩里許而得武陵仙溪
靈界洞天八大字刻于石上盤陀大石專于一壑可坐
千百人其色澄白如雪此萬瀑所未有也溪流被之或
駛或徐或演迤或渟滯者為幾峯壑幽邃春花秋葉俱
為勝賞

龍湫

龍湫在武陵溪上二十里由溪而行未數里得巢鶴臺
石峯屹立飛瀑下瀉可十許丈盤石亦可坐稍前而有
宿岩與劉等城相對卽新羅時兵士夜宿處云少上得
双瀑二水對流意態靜暇又踰一麓乃為龍湫，有三

層下則匯為深淵黝不見底中則水旋遠而下又復滯
滯、而後乃洩上則自下望之殊不見有異必涉一崗
諦視然後石壁之中呀如門者始見為瀑從其間瀉下
氣勢之壯偉亞於九龍淵谷口常有雲霧晝或晦暝遊
者徃、悸慄而返云

凌波臺

凌波臺在三陟府北十里有石百餘條聳立水中高可
五六丈膩白圓淨峭刻竒詭圓阜隆峙於海涯平正可
坐環阜而森羅者亦是石而縱橫叢列高低不一鏤鏤
亦巧勝似海金剛而比水城之凌波則又不啻天淵每

海波騰上殆過石之半洶湧澎湃勢甚可畏稱圓阜曰
秋岩高麗沈東老卜居作亭名之曰海岩臺韓上黨明
澮巡遊到此改之以凌波臺今廢阜下有小亭因其名

竹西樓

竹西樓在三陟府真珠館之西亦名茅一樓其曰竹西
者樓之東古有竹藏寺故名又稱古有名妓竹々而家
在樓東故名有壁千仞平正盤陀架樓其上下臨五十
川出紆實峴周折迴流凡四十七曲至樓下匯而為潭
澄清徹底境甚閑敞樓亦瀟灑為嶺東絕景樓之東有
凝碧軒絕壁澄潭亞於竹樓

鎮東樓

鎮東樓在三陟府東八里卽討捕營之東門樓也五十
川經其南大海環其東西南北群峯簇擁環列海色之
入望者稍遠而沙汀近而復闊一灣海水衝過樓外樓
之前水之涯_同相連又一灣水流至樓之南與海水
相渾成小湖柳堤松林蔭映於兩灣之間樓之西南有
小峯稱竹串島又名六香臺下豎退潮碑卽許眉叟
所撰書者也

聖留窟

聖留窟在蔚珍縣南十里石峯挿天勢甚雄偉下面有

小竇俯而入則內頗廣闊可容走馬漸進五六十步則
竇還窄狹呀如小牖匍匐乃過、則又復開廣行數十
步或凹或凸高低不齊左右石溜之懸垂者自成奇狀
或如僧佛或如幢塔異形詭像難以名言中有一莖直
石如柱而撐上以火柿之黃色玲瓏旁有如犬牙而垂
下者亦多以桴擊之其声如鼓如鍾前有深湫不得窮
源而返古之道僧聖留居於此脩戒故名云

門巖

門巖在蔚珍縣南四十里自聖留窟踰究理峙過迂嶺
四五導海而進石山一麓落自高峯乍起乍伏走入海

中麓尾斗絕土崩石出面，蓋前路乃窮見其地勢
若通路於山上則必由幾大嶺又若浮海而過則亦多
逶迤而中間一竇於石壁之中呀如虹霓者容一馬由
是竇達于平海郡神谷所贊不覺奇詭因以名門宕云

望洋亭

望洋亭在門宕南五里過宕而為津村鱗戶漁舍依厓
臨海村前斷崖圓峙突兀乍入海層亭在其上仰者都
是天俯瞰亦無地一碧萬里浩無涯涘其東無東其南
無南厓樓隱見鰲嶼出沒或洪濤怒號鯨鯢噴薄則隱
隱裏裏天摧地裂如素車奔風銀山碎崖近而視之鳴

沙鋪白海棠翻紅群魚族戲於波間葦雲迷離於浪頭
披襟一登洋、乎此造物者俱而不知其所窮然後始
信亭之奇而天地之廣且大也夫嶺東八百里到底足
望洋之處而登是亭則海始多亭所以名也崖下南北
數弓之間岩石之或危或水者大小為高低為無非奇
峯異巒而羅列如海金剛緣崖而下有石窠起上可坐
七八人名臨濤臺北望百步外有險棧歌雲人行如在
半天名鳥道棧云

越松亭

越松亭在平海郡東七里亭在萬五鎮後小墩上一帶

滄溟橫亘於碧霄白沙之間而北則都是松林周可五
里林之南有村落與亭相望亭之南城外有湖之外
湖廣野亭之東有沙岸之外海也松沙一畔石峯峯
起伏若蟄龍露角謠傳水上浮來作鎮茲亭或曰永郎
之徒初不知絕勝和睡越過故名以越松或曰昔有人
舟載越國松而來種故名或曰霽月初升晴影隱映於
松故名以越松云志曰 成廟在宥時 命画工畫上
八道射亭勝處惟永興龍興兩本郡越松亭蒙選人
未易甲乙 上曰龍興之芙蓉楊柳只是二節當以越
松為第一

天淵亭

天淵亭在江陵府西二十里自江陵上大関嶺之路傍也亭臨巨壑有白石流泉之勝上有邱山院宇

邱山院宇

邱山院宇在天淵亭南 明廟丙辰邑人咸軒入中國得吳道子所摸夫子像敎與府伯倡議建院而妥妥之蓋以地名邱山故也林壑周繞澗壑幽邃可以多士之藏修可以遊客之騁眺院之中有風詠樓之南麓有舞雩亭前有水石之勝巖曰詠敎台曰鳶魚橋曰訪道

大関嶺

大関嶺在江陵府西四十五里即州之望也嶺從長白
來南折為淮陽之金剛東迤為襄陽之天吼南轉為五
臺山五臺之南麓縱橫逶迤為大関嶺山之延袤自而南蟠
據東海之濱者不知其幾而此嶺竅高俗稱九十九曲
縈迴詰屈有如繹索行者魚貫乃可度十步之內後者
不能見前者百步之外前後行者又或相值如是者二
十里始達其頂山腰謂之半程是為西通京師之大路
回望東海極目無際鏡浦景色可俯而挹嶺東地勢曠
遠入望蓋大嶺之外即是大海天下之理一陰而一陽
有高則有深陽而高者為山陰而深者為海嶺山之宗

海水之府非此嶺無以限此海非此海不能敵此嶺、
以內山之高峻不知其幾千重嶺以外海之闊遠不知
其幾萬里也大抵山水奇觀常在於泉石岩壁而外山
多土少石故其步々可觀曲々可賞雖遜於內山上嶺
下海眺望四達勝地名區處々相望猝然達還心目俱
駭則又非內山之所及也

月精寺

月精寺在江陵府西一百四十里五臺山之大伽藍也
五峯環列大小均敵寺為山之門戶而洞府幽邃松檜
鬱然如長安之洞寺傍有金剛窟四面皆盤石瀑漚為

潭春則餘項魚千百為群至淵中澆灑云

史閣

史閣在月精寺西十里即金匱之所藏也山麓上起二層閣繞以牆上數十步有璿源閣下東麓有屋置僧徒以守之

上院菴

上院菴在史閣上十里自閣後踰獨塔時或溪而崗登頓行十里得上院菴在山腰勢甚高懸幽曠如楓嶽之圓通由此而可達中臺

五臺山中臺

中臺在上院庵後五臺之山盤據三百餘里雄深高大
與楓嶽相甲乙東曰滿月南曰麒麟西曰長嶺北曰象
王中曰智爐智爐即此臺五峯環列大小均等無奇岩
岵石危峯尖巖而一潭厚泰山分龍席環圍重疊是臺
作正榦而據其中望之若芙蓉之出水樓閣之浮空自
庵後攀藤附石而乃可上登其頂則众山拱護氣勢雄
拔一山精英盡萃于此上有禪堂自古無佛像但有浮
屠西臺下有泉湧出色味勝常其重亦然名曰于筒水
即漢水所出

清心臺

清心臺在江陵府西一百六十里大路之傍危巖聳立
上有松檜數株臺稍開敞可以眺望

仁穆王后御筆觀世音經跋尾

昔我 仁穆王后之在西宮也貞明公主時未簪降寶
侍左右備嘗艱險悲憤畏約 后於是時為公主祈禱
親寫觀世音經銀字五十八幅一帖捨施於金剛山之
榆岾寺即天啓辛酉秋也及夫 顯宗戊申冬是帖轉
入主第主手書小跋於帖下還歲於寺中寺僧奉之如
球璧式至今寶玩不已歲丙子夏小子入金剛到榆岾
寺僧擎出而示之謂小子為主之後孫也小子盥手敬

閱愴喜隨之後九年乙酉季秋小子以本道觀察使巡
過是山復入榆岾寺僧擎出示之如丙子夏又復披玩
奉來營衛使夫人趙氏改備新袂命工人精造小橫筥
年春巡親陪藏安如昔時噫我貴主極尊貴之榮躋顯
期之壽以能享用福祿於是乎翕絕光顯簪組代承而
如小子之不肖者承藉先庥滾到方伯之列斯豈非

后之爲公主祈福之餘蔭而祝願中一生之內逢百喜
千瑞所求所願隨心成就者耶雖然易有益流好福之
象詩曰求福不回我貴主始艱終亨德音不瑕貴而愈
恭滿而不溢則天道之與善理不爽也奚獨藉觀世音

洪敬瑛著

高等法院

上下均正耳長過口頷頤豐圓唇如點

八寸五分廣中而

黑頭戴三隅之冠端如七寶囊青色

三寸五分長如也

裏衫腰帶紅紋大帶左肩掛紅綠斑

七寸五分長如也

彩鉤而釦金下端當臍散垂右手持

長比身多四寸

尾踏床上有雙鞞鞞鼻有小紅繫鉤長比身多四寸

或曰師辨髮白髯神氣黑瑩平居儼然人望而畏之至

正癸卯冬十一月師示宋于燕京之天壽寺云時恭愍

王十二年也贊曰

高冠方弁塵脩然若遊方之外者也錦袈方慧珠宛然

是出世之表者也英英芳清而嚴豈其道蘊於中歟炯

報善之福而已哉崇禎戊申後一百五十九年丙戌仲春貴主六世孫江原道觀察使洪敬謨拜手謹識

西天提納薄陀尊者指空畫像贊

迦葉百八傳提納薄陀尊者指空大師西域摩竭提國王滿之第三子也八世出家師于南印度楞伽國吉祥山普明禪師自西天歷遍諸國元恭定間到中國又轉而東游高麗禮金剛山法起道場旋即還歸師之弟子懶翁等圖繪其像安于金剛之表訓寺師坐於交椅後設綠雲紋錦褥續以紅紋錦藉紅升簞画以正面面與手淡青微暗眼睛細而長眉毛豎而短鼻則山根過額

上下均正耳長過口頷頤豐圓唇如點朱髯與鬚中而
黑頭戴三隅之冠端如七寶囊青色紅綰身着玉色紅
裏衫腰帶紅紋大帶左肩掛紅絲斑斕袈裟貫綠纓於
彩鉤而鈎金下端當腮散垂右手持升節白塵左手執
尾踏床上有雙鞞鞞鼻有小紅繫鉤長比鼻紅趾白裏
或曰師辮髮白髯神氣黑瑩平居儼然人望而畏之至
正癸卯冬十一月師示宋于燕京之天壽寺云時恭愍
王十二年也贊曰

高冠方弁塵脩然若遊方之外者也錦袈方慧珠宛然
是出世之表者也英英芳清而嚴豈其道蘊於中歟

高等法院

要廣平字榻來

敬本

此是石幢也字凡十四詰屈音偉而

如天篆梵符古氣滿屋細按字體為廣平寺大頂尊勝

陀羅尼殿口口幢十四字而第十二十三兩字未及處

定為何字也夫廣平平康之新羅縣

冒其名而幢為寺之所豎則當定以器

標邑界者非也是幢也乃是千餘年

崛恰似真鑑額篆若置諸中國金石之

誠諸賞鑑其肯捨諸

書新羅弘覺禪師碑後

新羅雪山禪林院弘覺禪師碑舊在襄陽之沙林寺兵

弘覺碑

弘覺碑

弘覺碑

高等法院

炯芳淡而寂豈其學在於空歟天風飛錫來從何方兩
脚一步去何太忙適來適去曇華普磨云誰之像西方
之人兮

書新羅廣平寺石幢後

西堂李公罷釣錄云淮陽平康兩邑之界地名松園徑
險阻有碑無趺直挿土中其文似古篆字大如碗土人
相傳新羅時所立所以標二邑之界者余嘗掘得之螭
盤龍走恠偉無比持以示人雖專門篆法皆不能曉余
諦視久之屢能卞隨羅厓此非所以標邑界者當時高
僧書符以鎮妖魔但不知何代物余讀而識之及東來

要廣平字榻來本教此是后幢也字凡十四詰屈奇偉而
如天篆梵符古氣滿屋細按字體為廣平寺大頂尊勝
陀羅尼殿口口幢十四字而第十二十三兩字未敢遽
定為何字也夫廣平平康之新羅縣名也寺在當時亦
冒其名而幢為寺之所豎則當定以羅代舊跡而其云
標邑界者非也是幢也乃是千餘年舊物而書法之奇
崛恰似真鑑額篆若置諸中國金石之刻歐陽氏趙明
誠諸賞鑑其肯捨諸

書新羅弘覺禪師碑後

新羅雪山禪林院弘覺禪師碑舊在襄陽之沙林寺兵

部郎中金遠撰文沙門雲徹集晉右將軍王羲之書
于面車城縣令崔叟篆于額按地志土民苦其搨延以
野火碑遂碎知府安慶運拾殘片藏諸庫余於丙戌秋
巡過襄陽入府而搜之庫氏曰亡詢于老吏吏曰只知
志之所載不知庫之有也余曰庫雖亡載於志盍博求
之乎少焉吏返曰求之博而無得邑校所居之牆底石
稍大而異凡亟命舁來洗剔苔痕而視之果是也石凡
尺許而乃篆首下一片字之可字者為四百六十餘而
點畫耀耀欲動與三藏序為伯仲是碑也乃金安永安
閣所舣而尚在隣角前近百年大非隣角可及且與鑒

藏碑相上下噫右軍字蹟於華東存者無多此何異宋之楔帖而所餘者殆若九苞之片羽愈少愈寶然澤山民火之燒秦刻俱為斯文遺厄是可惜也

碧波大師浮圖碑銘

有名山於關以東者曰金劉曰雪嶽壘無竭眷屬住於斯闢道場闡禪教徃徃有高僧韻釋以龍象威音之學名示金繩覺路而卓錫於雪嶽者多於金劉乙酉秋余自金劉轉入內外雪嶽與神興上人勝琦談禪於飛仙之臺意有其人而未之逢焉再明年春琦為其師請銘浮圖曰師姓姜系出晉陽以英宗壬午生于襄陽十

三遊雪山見頂珠面壁者心艷之遂度于神興寺而淨
業其師也師生而俊偉稍長凝嚴律已大慈為心不緣
歸於名相而深造乎佛心故同舍者皆敬憚之凡名山
供劇之方龍般祝因之法莫不惟師是聽師亦以此自
任也中歲占禪窠於寺之溪北惟叅禪拜佛之是事聰
戒者曰聖谷傳鉢者曰雪潭而於清虛大覺師實為九
世孫也師雖老氣韻莊重望之殆不可押而專精內究
非三昧不屑也丁亥正月浴而更衣怡然入寂世壽六
十六法贍五十四先是得箇舍利如白金光者一歲之
旣荼有珠九顆散在燒臺從治命埋諸其地將以前所

出者安于塔師名巨寬碧波弼也願得大人一言重以
壽乎師且詔十方眾生余聞而嘆曰曩余遊神興也意
有其人而未之逢焉師果其人也歟遂為之銘曰
三千界皆幻也幻而歸之無若其可使無而有乎有之
非若法也然無使之有有使之久豈文若也余雖不文
師足以不朽

神興寺丹壘重修記

余於乙酉夏以節鎮關東省秋于蜀却歷入雪嶽有上
人勝琦膜拜于前曰琦現山之神興寺僧也寺雪嶽外
山而從山路入于此為一由旬且琦有宿緣於窻巖趙

三遊雪山見頂珠面壁者心艷之遂度于神興寺而淨
業其師也師生而俊偉稍長凝嚴律已大慈而心不緣
歸於名相而深造乎佛心故同舍者皆敬憚之凡名山
供劇之方龍船祝因之法莫不惟師是聽師亦以此自
任也中歲占禪窠於寺之溪北惟叅禪拜佛之是事聰
戒者曰聖谷傳鉢者曰雪潭而於清虛大覺師實為九
世孫也師雖老氣韻莊重望之殆不可押而專精內究
非三昧不屑也丁亥正月浴而更衣怡然入寂世壽六
十六法贈五十四先是得齒舍利如白金光者一歲之
旣茶有珠九顆散在燒臺從治命理諸其地將以前所

出者安于塔師名巨寬碧波弭也願得大人一言重以
壽乎師且詔十方众生余聞而嘆曰曩余遊神興也意
有其人而未之逢焉師果其人也歟遂為之銘曰

三千界皆幻也幻而歸之無若其可使無而有乎有之
非若法也然無使之有有使之久冀文若也余雖不文
師足以不朽

神興寺丹雘重修記

余於乙酉夏以節鎮關東省秋于屬部歷入雪嶽有上
人勝琦膜拜于前曰琦現山之神興寺僧也寺雪嶽外
山而從山路入于此為一由旬且琦有宿緣於雪嶽趙

公爲迎玉節而來矣余曰余可不以趙公之視爾視之
乎余將遵海而東轉至于神興爾其先還而俟我乎著
及九月旣望自清潤亭入天吼山寺在山下而琦出迎
于路左使琦前導探繼祖之窟陟飛仙之臺俯仰上下
景隨步轉與人世兩界也而雲橫煙鎖山危水瀉殆如
佛家所云頭頭物物皆從一覺中現者也及夫弭節于
普濟樓佛殿僧寮瑩然塵外而輪奐宏敞雖舊維新琦
進于前曰寺在羅季以禪定稱崇禎甲申靈瑞大師更
新而額之以神興迄于今四周餘而凡再修矣雖羣輩
革之入雲尚遲金碧之輝日是誠山門之欠事余許以

募緣之文信宿而歸丁亥春琦送其佐善慶謁于蓬萊
之池上曰幸賴善男子善女子無量衆生之施我舍我
寺之丹雘已成殿宇生顏潤壑增輝非公之惠曷以致
此願以一言賁之則亦公之惠也余許之旋以瓜及而
還善慶走人于京而告曰老師不幸示寂矣丹雘終竣
人事忽變公之無量化緣將無地標揭老師門誠心亦
何以昭眎乎以老師未卒之志謹再拜以請余聞而驚
且復之曰爾師之心口口一念誠心惟在於勤志行
業報答四恩則誠信所積當遍法界十方淨土無上福
田隨地湧現何有於一座雪嶽幾架神興耶斯足以誇

耀人天而隨緣現身過緣攝身所存者惟名焉而已必
不以甬師之存亡輕重之也噫切完身隕是亦甬師梅
熟蓮^香之一切甬頂觀世間物誰為不壞終不聞壞爛切
德塔甬師雖壞切塔自在由其信心誠力而起故也是
役也始於季春訖於仲夏董役者琦也繪圖者慎善也
而琦為靈瑞之十世孫佐法殿之營建在丁亥而繪事
又在丁亥云

小瀛洲閣重建上梁文

如登閬風如游縣圃海上名州無侈前人無廢後觀池
中小閣翼然孤鳳之翥翥宛如六鰲之移來顧惟臨溟

之靈區素稱大瀛之仙府環埤海七百餘里元精之所
凝融侯神嶽萬二千峯列真茲焉窟宅界限蒙谷何處
彭吳之建碑壤接岵夷茫然滅侯之閉國於焉造化之
留跡亦多湖海之擅奇鶴洞雲霞遙連五臺之福地鏡
浦烟月不讓三島之別天碧桃鸞笙洞賓題青蛇之句
寒松鹿井永郎傳金丹之方十里鳴沙羣鷗眠海棠之
雨千層巨浪六龍戲扶桑之雲會於心而與山川相遭
後茲邑者去神仙不遠始知多十洲佳處又重以數畝
方塘金波淪滌中有一拳孤嶼壁尾璀璨上則六角小
亭象

海

三山名所命也在衙東百步居相近乎曾日月

之幾何奄風雨之攸地壓欄額榭殆同麻姑海揚塵敗
荷枯池無復太乙舟泛月自此林密之無色久矣花木
之帶淒主人李侯號文酒仙耻流俗吏暮境作宰祗宜
梅閣之逍遙傳舍視官何論升樓之成毀然而泉石之
膏肓難化海山之名勝久荒肆乃按遺址而集功命遊
手移事遵沙堤而疏拓依舊一曲之芳潭列紋磴而安
排載新八楹之華構飛梁壓水策來金華之羊繡桶懸
虛駕得銀漢之鵲曰完已矣不負江陵之行仍舊如何
更揭瀛洲之弭於是簾捲鶴背之月軒納鷁頭之風霽
雲慈籠鉞山拱五彩之栢靈源混浩鏡水通九曲之灣

負嶠之影水鬢鬢嫩柳垂檻奔園之良菜毓郁香萼落
盤飄如烟化而登奚羨唐學士十八直欲褰裳以渡其
遇漢仙人席幾夢幻境於槐安大可知耳納須彌於芥
子小若然哉每於製錦之餘仍作游寫之所莎庭地近
既便散步而登臨月樓星連正合舒心而騁望閭閻繞
郭夕煙縷魚鱗之形湧漲橫坤曉日暈鰲背之影紅蕖
溢於水面不羨河陽一縣花紫柱壓於塘心更勝華陰
千丈井遠望則如龍眠所画近睇則若蜃氣所凝桂影
縈櫳似入素娥之殿桃花拂幌恍泛金母之池平臨而
羽翰自生迢迢乎浮埃迥絕俯瞰而毛髮可數飄飄然

灝氣與游所恨者葉城之珠宮纔成萊閣之玉節遽返
丹砂勾漏漫挹葛使君清綠明月南樓未酬庾刺史餘
興縱未得字目擊自不覺其神馳茲綴六偉之短篇要
與四仙而共語

拋梁東東海之東東復東製取紫霞衣當錦離離大繭
搏素東

拋梁西茅山嵐翠滴檐西閒雲潭影可秋日坐看游魚
蓮葉西

拋梁南向瑟羅開淡頂南昇化未聞昇化吏湖南休說
小江南

拋梁北
英英締雪
西欄北
述郎一去月千年
玄竈沈沈
丹白北

拋梁上
依然身在方壺上
知君清福世無儔
好作醉仙
平地上

拋梁下
十三天洞冠天下
璇風吹入篆香清
九點齊煙
浮在下

伏願上梁之後
蓮沼注溟海而不竭
杏梁倚雲日而彌
高
絳節霓裳頻迎王母之駕
珠網玉勝長留旻崖之名
表裡之形勝
無涯足稱人
去仙境朝夕之起居
常在
見太守風流

蓬萊閣重修上梁文

述夫渤澥東環呀玉高於八極浮邱左挹耀林館於十
洲浩渺風濤璚瓏樓閣然而未城玄圃仙階宵莖紺宇
丹臺靈跡恍惚曷若青天半落常近五色雲画棟朝飛
宛在中央水處煙火塵霧之內而地分清虛介城池臺
隍之間而景聚寥朗者哉願茲閣東觀察之府實是海
左佳麗之區管金劉萬二千峯開福地於仙界佛國鎮
埤海七百餘里供奇觀於鯨市鯨山鬱乎群玉之宮其
中綽約多仙子超然八紘之野此外廣漠無何鄉睠彼
芙蓉芳池爰有蓬萊小閣占衝後數武瀲灩金波之鏡

涵象海中三山點點瓊島之棋置繡甍瓊峙睨綠徇於
採藥觀風画橋齊浮卧青龍於垂虹偃月四時之佳景
畢具八咏之清賞皆兼久矣風雨之漂搖以致棟宇之
歌側霞鷺影逗鳳臺之江水空流笙簫響沉鶴樓之仙
人已去頃當駐節之日匪無意於重新未遑授矩之方
竊有望於來後今主人按使前身香案吏官跡金門仙
謬讀黃庭經謫居猶近於蓬鵬夢遊玉局觀真緣早結
於倅仝葭半載而獎舉政清按一路而年豐民樂王中
丞之重修滕閣追其今方蘇團練之改建岳樓如何舊
也於是閩役於三農之隙集功於數旬之間楹礎安排

不易六角頭規度軒檻稍寔皆從一心上經綸殆若翠
螺之運機擘尾璀璨倏如彩蜃之噓氣珠宮熒煌頗然
改前日之觀格舊是別天之境靈源廣濶通銀河赤岸
之邊華額高懸出方丈瀛洲之上璇樞月滿玉女繁而
下雲朱簾風褰金鵝騰而撒海于斯時也崇陰逗靜荷
風送涼選暇日芳登臨攬佳賞子容與輕裘緩帶披六
銖之霞衣綃軒雕欄張九華之寶帳澄波洞鑑金碧倒
玻璃之盤暖霧凝香珠翠擁綺羅之袖蹁跹舞綴嶺之
鶴鳳管臨風泛泛引太乙之蓮蘭棹溯月荅沸龍井紫
雲之玉宇閑緇花飛羽觴碧霞之瓊漿細酌於焉歇休

於小風波處徜徉乎好山水間白髮蒼顏除太守之宴
樂朝暮清香匝戟寇平仲之飲博優閑界濶三千飄飄
乎遺世而獨立樓高十二浩浩然造物者與遊斯乃軒
冕喬松咸曰階庭天海而余寤寐靈境桑宿之餘戀猶
存懷挹清標竹苞之善頌曷已茲擬遊仙之曲庸助呼
邪之聲

兒郎偉拋梁東鱗鱗纖縠漾晴空樓頭少妓奪珠箔玉
洞桃花萬樹紅

兒郎偉拋梁西丹穴雲深路不迷碧鷺飛來烟柳暗依
依若木金鴉棲

兒郎偉拋梁南步虛一曲月盈潭永郎昨夜來相過珍
重丹書貯玉函


兒郎偉拋梁北斗闌珊南斗側雲母空窓曉夢涼碧
天瑤露淨如拭


兒郎偉拋梁上有時笙鶴飄空響仙鄉從古不離房何
必天台與雁蕩

兒郎偉拋梁下無風鏡水自波心夢罷三清白日遲赤
欄橋外春光惹

伏願上樑之後六鰲長戴五鳳添修王母之桃千遍紅
玉宇輝暎麻姑之桑三變碧瑤池清連桂殿之斧月恒

圓何憂竹樓之易朽閨苑之璇璣遙灑不到華門之軟
塵永鎮三十六洞天長留千萬億浩劫










This image shows a blank, aged, cream-colored page, likely a ledger or account book page. The page is ruled with vertical lines, creating columns for entries. The paper has a slightly textured appearance with some dark smudges and a small dark mark near the top center. The left edge of the page shows a dark binding or gutter.





This image shows a blank, aged, cream-colored page, likely an endpaper or flyleaf of a book. The paper has a slightly textured appearance with some minor discoloration and small dark spots or smudges, particularly along the left edge and bottom. The right edge of the page is slightly irregular, suggesting it is part of a bound volume. There is no text or other markings on the page.





泛忽耶巡到所安候今承在萊
下書而日氣連不佳且酬接凡百
他處不啻十倍云伏慮餘姑不
伏惟

下鑒 上荅書



東省駐節錄